



木厓集卷之八

七言古一

贈別吳子遠先生公車北上

古者三年一選士其在成周爲賓興沿迄炎漢至唐宋昭
代因之法倍增國初已來無定額進士多者四五百布衣
韋帶識聖顏但得一命皆恩澤當時進士非不尊所貴羔
雁無私門如今科目嚴且隘每聞歐陽馬首喧先是言者
議罷止祖宗良法幾如屣我觀先朝賢公卿竹帛勳名多
繇此南宮之役當明年計偕車馬何翩翩桐子延陵實世
胄一時就道三着鞭方今天子坐宣室拜揚稱旨如膠

漆我公年少志澄清帝京聲價無其匹閉戶著書海內知
大者河嶽小珠璣孝廉二字誰不媿如公經術洵過之憶
昔庚辰霜蹄蹶主者空迷日五色公幸不入其網羅今爲
九方之駿物小子初生髮未齊朝夕倚公與提携公年三
十我二十才望何曾似鎮西願公明光先起草石渠金馬
爲君掃陽元如有外家風他年趨侍長安道

公子外
祖行也

臺城歌

君不見鷄鳴寺後是臺城古石短垣多斷裂荒藤縈蔓得
不傾有時天陰風怒號如聞弓刀戛擊聲相傳侯景謀不
軌佞佛之君歿於此當年塞北何曾清兵戈已自蕭牆起
嗚呼同泰寺已無雞鳴雞鳴胡爲乎祖宗建立特相傍分
明殷鑒堪嗟吁可憐生時茹齋素歿時泥水何穢汙從前
假歿便贖回一朝真歿滿朝金錢安在哉

結交行贈程葉二子

長干裘馬何翩翩皆言結交須少年少年醉舞珊瑚鞭日
暮齊登芙蓉船瑤琴寶瑟聲喧闐道傍觀之如神仙二子
閒居門晝閉結交已自兒童歲但期白首母相忘不信人
生有盟誓程子厚重多古風葉子沉靜將無同翹然聳身
百尺上俯瞰羣輩如螻蟻斗牛夜氣常雙見知與不知都
稱羨我聞此間有異人比來卜隣得識面當今能詩之家

非不多誰爲沈宋誰陰何却愛潘生詩思好往往摘句向
人歌君歌我詩我拂塵啾啾瓦缶何堪數架上書籍比丘
林試爲君吟唐杜甫杜甫遺集至今傳兩人更讀不停編
我學其詩亦已久祇恨形似神未全少陵老友有高李我
亦登臺臨流呼二子有唐三賢實鑒之所不克終如此水
嗚呼富貴貧賤俱不驕意氣岸越凌雲霄卽今風波容易
起莫言舟子更招招君不見管華同學稱莫道一事不投
遽割席又不見嵇康呂安困塵埃有時相思千里來

夏贊府歿難歌

諱統春
黃陂丞

春王正月賊犯楚黃陂士民棄城走遊騎入城已焚殺獨
見夏公嬰城守巷戰不勝遽就縛從容北嚮赴湯鑊強奴
故緩須臾歿朝夕置公於帷幕嗟乎賊亦慕聲名雖惡其
忠感其清公且隱忍狗鼠側血誠誓不與俱生辛苦賊中
凡三旬曾無一語相承應他人避歿歿不免如公求歿歿
不能先是賊僞立邑長挾公走荆索賚賞城中父老殺其
令賊乃轉戰無遺網十室十空鮮子黎更聞四出捕餘黨
公如父母看屠兒奮然罵賊何骯髒古來殺身只砍頭未
有割舌斷手抉咽喉次及心胸皆剖視屹如山立罵不休
方今廷議罷保舉吾鄉忠烈幾堪侔前有穀令後黃丞兩
賢義豈爲楚囚至今小西門外悲風起夜夜青燐環壁壘

妻兒空載骸骨歸賢良方正當如此嗚呼高牙大纛皆王
臣胡爲逃者降者相因循莫怪大臣不歿小臣歿歿乃無
負於天地與神人

勞勞桺歌送方子詒歸里

勞勞桺輕風拂地垂攀條折枝送君去聽我長歌古別離
身藏寶劍無人識手持璞璧誰不疑南州意氣百尺上鴻
飛冥冥何慕爲方今三豫成孤注鬼幽鬼燥相依附芳蘭
當戶都欲除蛾眉入宮合見妒君才百倍於時賢翱翔九
州不足顧遊梁詞賦跨前驅入洛聲名推獨步都門二月
春正妍孤帆夜泊芳洲烟生憎終南是捷徑却擬關門學
草玄男兒成名會須早不然一出便傾倒賦鵬終憐賈誼
才爲郎翻怪馮唐老知君努力待明時安能渙忍甘小艸
予亦從此戢隱鱗握手臨岐傷懷抱何以贈之璫瑁簪又
何贈之綠綺琴琴以賡求凰之妙曲簪以銘斷金之同心
故園有發越謂東之木夫也少小成結髮朝望龍眠嶺頭雲暮眺
射蛟臺上月君雖在龍眠與蛟臺千里相思幾時歇

孤凰篇爲張邑侯太夫人賦

邑侯諱利民福閩人

君不見鸞凰之飛摩蒼天一日失雄墮平川中夜悲鳴無
伴侶哀哀遺雛相牽連雛羽短微雛力薄朝哺竹實暮桑
酪願言生長報所天無使鷹鳥肆搏攫漸看五象九苞成

奮翼翱翔何崢嶸西過崑崙濯弱水一鳴天下皆太平德
暉四海藹紛被見與不見皆稱瑞豈知丹穴哺伏時孤鳳
引護之所致嗚呼士元已往鳳雛誰閩中張侯再見之張
侯少孤方襁褓太君十八守空帷清心直與玉同潔勁節
不隨霜俱滅挺然閩範多苦吟大家道韞堪比潔登堂教
子成大才復禪長被無嫌猜牛衣泣窮窮不送馬薦招客
客時來十年冰雪如一日無祿中道俱拋失以此郡邑不
上聞我侯悲憤淚橫溢壬午之夏飛鳧過巖邑瘡痍息兵
戈手持遺編不忍釋哭向諸生講蓼莪小小相依苦偏側
風不肯休樹無力一命服自斷機來五斗米從丸膽得比
來江北無堅城還聞桐子絃誦聲共知捧檄安陽日猶奉
徵兵洗氏名吁嗟夫人衆母母生侯成侯爲桐守願侯早
晚侍承明銘之汗青傳不朽

短歌行贈王郎暄文

王郎酒酣拔劍斫地歌且哀誰能識爾欽崎倜儻之奇才
布袍革履行市上半生坎壈困塵埃男兒致身苦不早貧
賤交游從來少翟公官罷可張羅况乃孤蓬棲枯槁世人
相面不相心祇緣壯士無黃金野鶴昂昂翔雲際毛羽且
復遜山禽君不見傅粉何郎身被戮洗馬看殺嗟何速郝
隆七日不曝衣知君錦繡在君腹

糶穀謠

客有自桐來者言桐事甚悉爲二謠以紀之

六月七月新穀賤遠屯山寨近屯縣城中官兵無儲糧道
傍觀之忌且羨將軍下令貸民間黃童白叟無歡顏維此
枵腹亦誠苦維彼剜肉豈不艱當時種田已一誤耗囊洗
橐爲孤注但求旨蓄能禦冬僥倖枝梧免逋賦喜今官吏
罷催征入門反復苦官兵殺雞烹彘延上坐瞋眸怒詈不
絕聲囚首哀辭乞垂聽前後只有車三乘已願盡沒濟軍
需尚備千錢爲私贈歸來作書與弟兄此後有穀莫入城
不如五石六石送商賈來春食盡歸黃土

乞食謠

髯參軍短主簿幕中賓客如奴虜蝦身蜜舌丐同盟飲醢
嘗糞不言苦舊識轅門禮數寬單衣白袷任盤桓排闥直
入無猜諱朝至卽饗暮卽餐醇酒肥牛歡未足更乞俳優
三兩曲歌聲纔發輒言佳喝采連聲無斷續酒罷更闌騎
馬回狂歌自比玉山摧沿街邏卒誰當道稱自前營左營
來一年三百六十宴中雜偏裨與屬掾但願老將長鎮桐
白首酣歌少征戰嗚呼志士常懷一飯恩出生入歿走公
門且報繡衣行部至謁見何爲惜片言

蕪陰遇蕭尺木爲予畫扇書此以贈

龍眠山中有畫師我思前賢李伯時於今烽火間榛莽望
望浮山如見之浮山龍眠亘百里誰爲予圖此山水早泊
蕪關訪隱淪中有幽人蕭伯子伯子善畫更善文中歲不
第似劉蕡且復寄興丹青裏筆氣如烟墨如雲高高者山
蒼蒼者樹石橋滙其流茅屋環其路乃知世外無桃源只
在眼前觀去住

催科歎

仲冬風日何淒淒巷南巷北人晝啼可憐官家稅不足富
賣田莊貧賣妻城外田中生松樹人歿田荒何處訴生人
枉代歿人糧荒田苦納熟田賦鄉下老農負破囊白頭赤
脚號路傍昨聞十日復一比此身那得常在鄉一年田賦
有成案府帖畱中不得看官家已取什之三長吏還欲徵
其半夜深苦寒復苦飢流霰滿天撲面飛堂下百人相向
泣猶待令君賞雪歸歸來鐵面鬚如戟按籍呼名施三尺
自分不得免鞭笞忍寒未敢前受責可憐杖下歿數人無
名無姓無六親夜闌令君方退食回首堦前鬼火新

臘日立春有感

今年人日春方至予時醉倒長安肆何期一歲再逢春眼
前滄桑市朝異憶在長安舊酒樓春盤春菜揚金觥彩旛
錦障拂闌干四座風流間珠翠東郊大鼓迓春來幻作角

觚拖鈎戲百官魚貫擁緋輿花插貂蟬紅繫臂谷風流霰
乍晴曛青陽雲翹雜繁吹大官騶唱半籠街小官觀者亦
却避獨有貴戚侈豪遊玉盃金壘列姬侍雲樓綺席各相
望不數東方千餘騎此時獸炭沸羊羔江南主人方鼾睡
不聞閣下景陽鐘那知宮外銅駝淚景陽銅駝忽成灰漢
曆猶存王臘易歸來雖有探春情對此冠裳憂心醉塵沙
黯黯日無光悲風入骨如刀刺凍土作牛牛不肥牛前罨
耳芒神位黃頭青尾牛色殊青衣白繫行纏隊老農不解
按支干強占水旱誇其智市僧生涯好迎新還家競帖空
春字予亦呼童覓菜盤其如門外催租吏

歲晏行

歲云暮矣日月除今此不樂胡爲乎嘗恐樂極悲卽至私
家催負吏催租往歲人家餽酒肉今年除日相向哭荒田
插禾禾無科半飽將橐半馬腹縣官苛政復誅求賣田完
稅無人收爺娘妻子抱頭泣合家忍淚賣畊牛富家賣牛
牛價賤貧家無牛爲人佃隔年乞得千銅錢且賄吏胥免
赴縣赴縣入衙謁長官捨地呼天肉已剗怒詈鞭笞遭捶
辱依舊追呼不少寬城中稱貸如空谷哭向黃昏投店屋
不及江陵縣裏囚歲除猶得還家宿

憶昔行

元夜作

今夕何夕燈火無雨脚如麻流通衢却憶昔年此夜月清
光瀾漫臨宮闕是時天子坐內廷宮女踏歌聲不停五侯
七貴競入貢明珠錦照琉璃屏燈市燈樓價翔貴寶騎駢
闐如鼎沸問誰結綵據要津左爲丞相右太尉中有佳人
字莫愁袷服明粧獨倚樓烟火叢中足顏色一笑千人皆
舉頭市上珍奇復盈案古鼎名帖值百萬貴家自競賞鑒
殊手持贖物心何恨予亦租樓評事街肉如京坻酒如淮
寬裳一曲來空際紅粉雙雙落寶釵誰家樓閣紛相向鬪
火蹴毬各異狀中宵興罷輒言歸惟予漏盡神猶王已知
金吾夜禁寬呼朋擣蒲共盤桓酒渴黃柑傳欲盡醉踏長
虹望廣寒還家却向東方笑人生悲喜固難料今宵風雨
對孤燈誰把太乙青藜照

二月十九日生子

我父生我年十九我今廿八纔有後回首却憶十年前一
再生兒不解憐當時只道生兒早旦晚啼哭增煩惱荏苒
及今始探銀翻悔少年何顛倒弱女今年已八齡雙手抱
弟到中庭老母焚香拜且祝我父門內又添丁如今哭聲
亦可喜雙瞳炯炯清如水幾番鄭重語山妻視之勿但如

阿姊

懷方爾止子留

龍眠巨室推桂林文章節義世所欽國初沈淵有斷事節
義寥寥直至今爾止知止故不殆子畱畱身將有待嗟爾
兩人豈好名但求天下後世告無罪貢舉車馬何駢喧云
何携手去都門一家叔姪同心少萬古君臣大義存白露
爲霜西風急滿天鴻鴈秋翎溼念爾兩人立蘆中手持一
編歌且泣或云泣盡淚亦乾有詩慎勿與人看看者或悲
亦或忌恐有不測之波瀾君不見淵明集中無宋字億翁
心史守宋志其人無恙其書傳忠孝之名復何媿子亦雅
志在蕨薇其如孤子孀親情依依念爾兩人文行何峻潔
欲往從之時勢非却怪世人何太譎已則不能笑人拙月
落屋梁楓林青爾盍歸來話離別

爲張圯孺移家作

嘗怪古人好名義其事傳真亦傳僞同居九世若同心何
必連書百忍字童子尚不因人炊焉有寄人廡下事不如
獨居所全多且亦自明鴻鵠志君知公藝爲腐儒又知伯
鸞乃大噐歟典牛衣卜西隣手披荆莽良非易况復爾祖
故廬存墜茨丹塗益不墜自今欲訪茂先居依然策杖城
南肆知君先世家城南雖未充閭存此意君才自足大于
門眼前困約何足累南阮若自恥其貧豈與北阮居同地
且從竹林伴嗣宗昔人得一君得二

圯孺讀書子萬齋中
又與子亮望衡得二

步兵 子還舊巢亦有年所嗟湫溷如旅次安得結廬傍幽
人與君痛飲同姜被吁嗟乎祖宗櫛沐何艱難河山竟等
秋毛棄如君一椽一石念先人夷甫諸人能無愧

苦雨歎
山上雷聲喧山下雨翻盆風聲如潮雲晝黑蒼天慘戚無
顏色夜半雨猛屋盡穿兒號女詈不得眠披衣乞火厨無
烟水深泥濁到床前老妻擁被被裏裂但求天速明不怨
雨不絕忽憶几上數卷書暗裏摸索冷如鐵捲向床頭敝
簾中猶恐倉皇多損折何幸隔隣雞乍鳴嬌女倦欲卧嬌
兒無哭聲怪殺雨天不肯曙東方欲明猶未明強起抱薪
雙股慄溼薪翳火火不出却尋夜來漏處已成河雨勢纔
紆雷聲疾坐看簷溜滴不休抱兒挈女相對愁奈何庭鴨
喜多雨公然展翅堦下舞

投杼歎

曾參必非殺人人慈母不能明其假賢如曾參猶投杼何
况人在曾參下乃知來告參殺人此人卽是殺參者

後苦雨歎

陰雲肅肅風中來溼氣爲蟲爲莓苔晴天日影到不得何
况疾雨與狂雷狂雷疾雨兼風打鼠逐其羣破屋瓦夜半
中椽一竇穿屋脊之雨勢如瀉嘗時漏處亦不無所幸填

塞祇須臾奈何此竇不及備乃使環堵一室成具區披衣
下牀黑無火赤脚踏泥泥滑我依稀聽得雨聲微鼠復跳
號屋瓦墮可嘆雨休漏不休衣裳淋漓書飄浮雞鳴窗白
天欲曙尚聞啾啾唧唧繞牀頭吁嗟乎天有風雨人有室
或云天已連陰四十日鼠乎鼠乎爾信頑天晴爾無藏身
術爾不見桁衣鬻盡盎粟空三歲貫汝誰之功我今不愁
陰晴天難卜但求鼠莫穿我屋再祝天雨稻梁充爾腹

犀杯行

有持犀杯求直者云吾家故物也潘子見而傷之作
犀杯行

犀杯之產自海濱我欲求之渡無津有客來索十金費其
物雖真其直貴舉手謝客爾徒然我今尚負酒家錢有錢
且將多沽酒有酒何妨用瓦缶客復致詞此家琛君世傳
之比南金嗟爾客語何迂闊不賢合爲勢家奪祇今天下
重器須臾移區區此杯安足悲而况吾家故物被烏攫奚
啻千杯萬杯填溪壑客聞此言色大慚君猶如此我何堪
前車之覆後車戒回身急向富兒賣

憶昔行贈董子九

憶昔遨遊皖江濱范生壁上多煙雲訊之知爲先生作筆
瀾墨氣何氤氳先生中年厭首宿坐臥前賢紙數幅庭閒

祇有草如瓊門冷兼無人送菊竭來采勝投子山山深水
秀飽躋攀自非胸中有丘壑安得尋尺紉素間山截業兮
水潺湲嗚呼官作廣文人所倨何況廣文官復去挾君之
畫與君才莫道天涯無坐處君不見仲舒對策真賢良老
大猶相膠西王

寄張鸞上

張子與予交最蚤其時黃生吳生未交好一自滄桑歸里
門兩生翻爲予傾倒今年秋入石頭城見君投刺知君名
要我至家酌醴醪幅幅烟雲觸手生君才百倍年方壯卽
看圖像雲臺上區區小技何足稱亦自逡巡謝未能爲言
對宇有施子其人沉深得畫理酒酣落筆不知多亦或五
日一山十日水又言阿叔更奇矯蟲卽真蟲鳥真鳥興闌
携我訪名園滿座滄洲青未了大阮小阮解琅玕示我兩
幅皆奇觀惜也邂逅別施子道遠安能生羽翰黃生爲予
索二妙得之當不減雲嶠君如不妒我貪婪早晚迫促遺
同調

方井公三十

羨君讀書萬卷餘不道無魚復無車夜然青藜天祿閣晝
揮玄草子雲居憶昔逢君金陵寺嶽嵴歷落如兒驥携手
春星論古懽回思已是十年事爾時祇道結交情豈知踰

歲定姻盟彥道雖然猶有妹太冲未免媿爲兄自此連床
共風雨見君才思爲君舞草聖不殊顏魯公詩史直窺杜
工部十年詞賦動江濱關西伯起從如雲挾策不得見天
子談經空逐諸生羣感君意氣摧天棧等閒躑躅梁王簡
結髮長懷古處心掉頭不顧時人眼君才本足成梁棟他
時定作明堂用驥子佇看舅不如牛衣况有人堪共勸君
對酒勿悲吁安車蒲輪無時無雲鴻自合騰霄漢神龍豈
應困泥塗君勿謂丈夫轍軻遂足恥我有一言令君喜彈
指明年復明年猶不失爲少進士

和陽王氏一門五烈歌

崇禎八年賊如蝟蔓施楚豫暨秦魏轉戰江北滁和間十
城九城無生氣爾時和陽隸陪京相距衣帶水盈盈不聞
樞府遺一矢不聞京營發一兵以故朝至夕隨破戰者披
靡守者墮俘馘僇辱千萬人白骨如山滿城臥先是王氏
有盟言集女於廟婦于門賊至義勿受彼辱等死死當爲
貞竟未幾賊燧果危逼婦女求死死不得各呼其夫夫爭
前拔刃刃長舉無力可憐一女四婦爭相持死同一刃復
同時或曰和爲豐沛地先皇風化猶未墜或曰王氏世青
箱傳家節義有餘芳嗚呼背君恩者食君祿滿眼庸庸皆
厚福豈無累世席簪纓一朝國破爲臣僕乃知巾幗之中

有丈夫寧死不受盜賊污若將世眼觀往事此一女四婦
何其愚君不見殺妻者夫殺姊者弟此婦此姊良獨難此
弟此夫亦不易信乎王氏多節義又不見河邨戴子爲傳
記十年之後遇滄桑亦能之歟矢靡二

送劉爾雅北上廷試

長安二月宮花香紛紛裘馬賦長楊爾獨何爲始倣裝言
脂其車自故鄉去年八月槐花黃素鞞纒纒守親喪一日
未除不忍忘吾寧雖伏弟子行此意纏綿良可傷天其或
者降之祥未幾下詔求賢良果然一出卽騰驤今日科名
等糝糠黃金百斛走文場益公惡圓而爲方七十六人人
鸞凰喜君出身自文章始進旣正安可量送送臨風意飛
揚萬里之行自此長竚看彩筆霏琳瑯射策王庭不可當
太學人文雖濟蹕有才如此胡徬徨男兒致身苟有常明
經進士誰低昂况君百倍少年郎千尺雲遶彈指翔黃金
臺上何輝光朝躡金門暮玉堂作詩贈君吾恐惶青雲青
山兩相望

揚家打虎歌

白麟山下虎相逐三三兩兩繞林谷未昏便伺路傍人將
曉猶攬籬邊犢行人到此輒逡巡我亦爲之停車輪忽逢
少年三五輩自云揚家打虎人不幸家隣猛虎窟長戈彊

弩時出沒更織獸皮爲網羅張羅置杙向叢樾殺虎本用
衛民生誰知翻以虎得名官家緣此著爲今年年打虎誤
春耕春來打虎限時刻頭限二限吏如織虎歿疾馳獻虎
皮少緩須臾坐隱匿且如今年新令來送官何愁無錢財
帖取虎皮月數下昨朝馬上使人催嗟我楊氏一何愚且
昧除害適自貽其害却喜雲霧四山逃拚向深林張羅艾
我聞此言重興悲胡不毀網折弩扶畊犁楊家少年淚如
雨畏官何能復畏虎

重建滕王閣歌爲漕督蔡公賦

滕王閣何嵬峩遙瞻匡阜千峰翠俯瞰章江百尺波一從
帝子歌舞後朱簾畫棟竟如何桓桓蔡公信人傑特膺簡
命專鈇鉞謳吟已滿峴山碑風流更愛南樓月乃眷此閣
鼎新之一旦鳩工百執隨卽此知公無廢事諸所罷行皆
如斯閣成受簡良不易王勃有序韓有記閻公雅望烏足
倫中丞惠政洵無媿朝廷知公仁且賢詔督漕渠治海壩
把酒落成雖不暇勳名終與閣俱傳君不見新政已慰雲
霓渴興頽舉廢復如昨仁風甘雨徧東南奚止區區滕王
閣

皖上與馬永公望江有作

君不見岷山之源發江水逶迤奔折幾千里宜城城下瞰

大江滔滔天塹南國紀城中山坡高於城與君登山目縱
橫南望江州波浩淼東眺天門浪碎訇隔岸晴巒青可數
上下風帆疾如雨因思此地古戰場曾駐旌旗建樓櫓孫
郎年少起江東始克皖城何其雄可惜東南方起事不能
長驅收成功偉哉王師熾友諒海門風急秋濤漲再陷再
復扼咽喉揚帆始至荆襄上烟波寧謐曾幾時宸濠公然
來稱師嚮非張公楊公能歿守南昌雖破南京危吁嗟乎
乙酉之夏左師亂名則除奸實則叛城中焚僇萬餘家江
上殺人無邊岸由來此地據上游誰秉國鈞無遠謀與君
竚立歎復歎東流之水空悠悠

驪駒歌爲陳生賦

平生愛跨青絲騎家貧價重邈難致陳生本是權奇人年
少與予有同嗜自言有馬名烏騅迢迢遠自榆關至雙眼
懸珠黑似漆四蹄踣鐵疾如鶩等閒牽來不著鞍臙足毛
純光照地昨向貴人新買得貴人不重馬重利嗟彼位高
金且多賣馬公然等市肆何若君無擔石儲百金買馬十
金轡惜乎烏錐名不宜世人顧名鮮思義騅爲蒼白雜成
文細看此馬殊不類其色純黑其齒齊改曰驪駒庶無媿
驪駒驪駒聽我歌爾今得主良不易爾旣齒小足驅馳主
亦妙年饒遠志與主成功三十年陳生陳生人中驥

木棉行志與主知世三十年則全蜀士人中
舒城道上塵如烟大車小車載木棉更有驢羸及負擔一
日之間過百千借問木棉來何處估客將舟走商豫裝向
江南并江西賣與人家作衣絮繇來東南多轉輸飛芻輓
粟無時無西北雖然少稼穡猶種此物佐寒需奈何不畊
復不織空使腴田長荆棘嗟爾舒人亦何愚車載肩擔謀
衣食

抵歸德寄呈母氏

暮見日入朝見出冉冉征途十二日卜夜不愁天意陰瞻
雲但念慈幃疾人生豐約各有時乞食羞與鷄鶩匹何當
歸飲桐陂水跪爲北堂理澁术

梁園行

梁園自古稱宋國白馬萋苴何愴惻千餘年後封梁王置
酒平臺樂無極一時鄒枚諸儒生賦雪賦月才縱橫養士
風微人競羨至今遂以梁園名又千餘年天寶末祿山無
賴犯京洛睢陽食盡張許亡九原生氣猶可作我來此地
吊前賢但聞梁園人爭傳幾回却詢張許事欲答不答心
茫然世人重文輕節義動稱梁王能好士不傳張許傳鄒
枚何怪人臣懷二志祇今鄒枚安在哉荒煙衰艸沒平臺
不及二忠祠雖圯猶有春秋酒一杯

谿南草堂詩爲陳簡菴賦

先生名卿之子孫清白相傳裕後昆歸老林泉無長物都
諫所築惟東園皇皇叅政躡芳躅妙氣爲齋枕堤曲十里
荷花雨後香千條柳色風前綠當時卜築傍南谿眉檐肩
堵足幽棲亂餘田圃成荆棘蒼蒼古木與雲齊草堂重構
復何意村花野水天然致先人本不愛繁華子孫寧更煩
塗墍我來黍丘特追尋登君草堂爲君吟詞客紛紛鋪美
勝心知雅非先生心自言地僻倚林麓劃粥茹藿媿幽獨
錦字朝乘秋雨揮玄經夜向春星讀平泉子孫愚且貧輕
將木石與他人何如草堂一片地食貧苦節伴松筠君不

見谿南詩文自怡悅草書兼欲稱三絕詞場梁苑未全墟

賴爾寒窗吟白雪

先生大父都諫公始築東園尊甫叅政公有妙氣齋因卽其地爲谿南草堂

柳梢行

柳梢柳梢何填委家家場圃積如壘借問積此更何爲填
塞黃河工未已我聞黃河自天來汪洋澎湃幾千里遠從
積石導龍門其性奔決喜遷徙昔在先朝全盛時河防邊
備相依倚秋霖夏澇有疎虞大臣褫逐小臣死上衛泗陵
下親藩綢繆桑土無暇晷自從河決到荆隆三省哭聲酸
人耳不議疏濬議填塞千埽萬埽中流砥旣向鄉村責柳
梢復從城市搜麻臬官有本折工有餽胡爲民間浚膏髓

可憐一埽數千金河夫數百忙如蟻不幸湍激難拄撐數
百人隨埽落水奈何下埽復不固載沈載浮無根柢一朝
雨後漲河流金錢百萬洪波裏甚或懲噎委岸傍歲月糜
爛如敝屣其實塞河亦無難河塞官憂吏弗喜官吏以河
爲奇貨日日更番迎歌妓譬如崇禎諸鎮將剿賊翻畱賊
爲餌幸也皇天厭亂河自塞否則流毒伊胡底祇今河工
已告罷猶聞柳梢禁不止嗟爾農夫插柳時本期析薪炊
糠粃從此柳梢屬官家私剪私伐遭鞭箠採樵更防他盜
來悔不田間種荆杞

歲晏行

歲云暮矣役車休我今不歸何所求老親甘毳應未缺所
嗟先壠委荒丘桐城春冬重祭掃祀先不獨在家廟紙錢
上塚掛枯楊爆竹連山延野燒可憐遊子不得還朝朝有
夢到家山客中贏得三冬煖歲暮空偷十日閒願我來年
守稼穡葬祭以時供子職清明除日狐兔嗥跪呼墓前兒
在側

響馬歎

日日聽人說響馬山東河北徧原野黍丘東北尤長驅出
沒豐碭無時無我聞卯金赤帝子此邦乃其發祥里胡爲
至今聚逋逃殺人攫金如秋毫弓箭在腰刀在手過耳響

木厓集卷之八
箭聲如吼可憐宦遊多隄防所向剽掠惟客商暮聚村中
平明散男子受縛婦女爨響馬纔去趣報官官兵來時雞
犬完吁嗟響馬爾何酷仇此一方何時足近說響馬報漸
稀聞者不喜暗歔歎分明來去戒勿洩免教官兵復如櫛

木厓集卷之八終

木厓集卷之九

七言古二

竹署歌爲李草樓先生賦

江南才子文章伯廿載聲名何籍籍結綬初栽千樹花
寒帷更報雙岐麥官齋地狹吏人稀不種桃李與薔薇
手植琅玕千萬箇勁節亭亭拂翠微知君宦况清如水
世間惟有竹堪擬鶴影遙橫寒碧間書聲細入幽篁裏
有時竹下引鷄雛大婦小婦共登樓詩成獨酌傾三雅
醉後狂歌傲五侯濟濟梁園詞賦客盡向竹中永朝夕
不分王猷私此君重教淇澳歌如簣我來訪君見君情
自言竹署清復清

夢回秋簾浮微綠吟罷晴窗作雨聲問君竹署何所有百
卷圖書十斛酒一飲從教苦繫維千迴肯復辭奔走坐君
竹署爲君歌竹枝竹葉何婆娑傷人錯作甘棠比君心了
不異藤蘿我家亦有竹蔭屋浪遊空鎖千尋玉羨君作宦
翻如家清韻在人不在竹

畱別陳簡菴

臘日晴明胡不歸游子扣門恆苦飢今朝牽馬出城去霏
霏細雨溼征衣感君綢繆久不厭古道照人足箴砭百徧
過從未覺頻一朝不見深相念結交不少雷與陳意氣未
有如君真池中水黑書千紙座上花開酒百巡從此肝膽
向誰剖天涯歲暮空回首尺素應憑驛路梅夢竟長憶谿
堂柳

贈嘉禾郁文韜卽送其遊粵東

越西才子何超絕辭家遠泛樅川棹得句渾如江上青論
交不逐炊邊熱榻來山城訪故人飄然獨鶴離風塵臨叩
重客知何限意氣惟君篤且真何期邂逅遽傾倒見予謬
說予詩好豈有諸技堪揚誇此意令人深懷抱知君到此
少周旋相逢惟予與龍眠山水龍眠洵不媿文章許我誠
何緣却謂此行吾願足輕裝欲向羊城卜眼看安邑清且
仁何忍區區累口腹感茲古義倍綢繆平原不得少淹留

嶺南之遊遊何壯翻將此地作并州勸君萬里慎舟楫秋
風起時歸思切好同驛使折梅花重來共踏龍眠雪

輓項劬思

吁嗟哉項劬思爾獨何爲至於斯他人進身不以正衣鉢
相傳走捷徑爾本孤寒致科名胡爲爲人效奔競得無滿
朝牙僧徒祇有多寡無有無未能免俗聊一戲豈知事敗
殞其軀今日科名如珍膳大官小官攫一嚙脫予微倖登
賢書或恐此事亦不免嗟嗟劬思行且休竟今歸來龍眠
丘古今冤事都如此竊鉤者誅竊國侯請看老僧盈朝右
何人不戴死骷髏

長干女兒歌

長干女兒菊花殘家家刺繡描紅鸞忽聞縣官採宮女阿
翁阿婆心悲酸昔年採取充嬪御十室九室無人去何况
于今乏使令入宮冷煖知何處更聞一女一婦隨啼痕感
損文君眉媒媪奔馳無氣力東家有姑西有嫠女兒生長
長千里不願改粧媚天子阿婆何歡能勝悲綠窗暗卜心
欣喜富家女兒鳳釵斜貧家女兒插蓮花狹巷車騎無避
處但聞人喧簫鼓譁可惜九街無昏曉牽羊摯鴈花燈繞
老稚賢愚妍醜間悞繫紅絲知多少雖然苦樂不由身樂
亦勿喜苦勿嗔君不見邯鄲才人廝養婦何如上陽宮裏

人

春郊行

桐城城外春風煖，椒觴傳罷花燈散。梨園子弟按霓裳，春郊處處聞絲管。城中士女好春遊，連袂踏青來陌頭。佳人結伴褰帷幕，香車絡繹如雲浮。可憐秋月窺人面，可憐秋水澄如練。翠袖風吹蘭麝飄，晶簾日射烟鬟現。侯家戚里多少年，冰紈寶帶臨風前。笑聲忽向簾中出，人人自喜遇嬋娟。高臺日午歌鐘起，嫋嫋流鶯遙入耳。妖童作笑復銜哀，悲則真悲喜真喜。雖然風俗等遊戲，其中勸戒非無意。誰教忽奏新翻曲，普天痛哭煤山事。君不見牧童樵豎皆酸辛，遊女歔歔亦愴神。河邊載酒閒觀者，翻是當年受爵人。

壽楊母汪孺人

君不見袁夏甫，行年五十薄升斗。朝夕舉觴拜阿母，又不見尹和靖，讀書明道身。被放不用祿，養用善養楊家壽。母識此理，頭白如霜，甘菽水關西伯起，更安貧信乎是母生。是子君有祖母劉，太君年登九十康，且寧壽母孝謹同唐。母何以報之，錫爾齡，憶昔辰冬逢八袞，滿堂祝釐諧笙瑟。花輿竹杖，日月長，彈指俄稱八十七。小子風塵時翱翔，及今始補南山章。阿姑九十安足道，百歲千秋直尋常。登堂

稱竿方未央

滴雷行

滴雷復滴雷雷聲無昏晝霧散纔聞點點稀雲來旋覺聲
聲驟初如霜風之振隕穉蕭蕭颯颯其聲殺以淒隨如匡
廬山黃石之瀑三疊之泉拖天紳而挾泉竇迅如黃河初
漲吼浪崩濤欲與渴驥怒猊爭瞬息之疾遲緩如露永更
沈深宮中忽斷忽續乍有乍無之銅漏暴如夏凍颼馳屋
瓦喧豗作陣而來若萬馬之奔騰綿如秋霖淹淹帶露沾
濡因風哽咽而與征婦之朝杵暮砧相先後吁嗟滴雷胡
爲哉將無應龍排浪上雲霄抑或銀河倒瀉通溟渤不然
春光九十日胡爲七十晝夜無休歇祇愁夏五望霓占星
時屋瓦生衣石生髮

悲人日

哀項烈婦也

已亥人日日晝晦寶婺西沈蘭玉碎貞媛義不出壺幃慷
慨捐生裂衿佩可憐身後兒女無雙塚同穴委蒿萊頭白
孀親如苟延年年酌酒燒春菜

采蓮嘆

采蓮項氏婢也法當沒入官感主母就義亦自經歟

古人忠烈歿王事正氣往往動僚吏不聞閨閣媵侍中亦
能觀感矢靡二長安牛車馬矢腥姬姜掩面整珠翠不知
誰貴更誰賤爲歌采蓮發長喟

松山歌爲余振千五十

年年松山過不見松山樹始疑松山浪得名及到君家知其故君家松樹叅雲天霜皮虬幹何蜿蜒植根不知自何代父老相傳數百年亂後還家賸林麓重向松邊結華屋堂上靈萱七漸加堦前玉樹書能讀與君結交二十霜君今及艾我及彊蒲柳衰殘那足道却看松樹轉蒼蒼祇緣傲骨脫塵滓睥睨榮利如糠粃高臥自號隨道人等閒不肯入城市君不見千鍾粟萬戶侯往往樂極生悲憂何如箕踞長松下有詩有酒且遨遊願君雅尚追箕顛與松同壽山同靜得句休教古錦空當筵莫遣霞觴冷隨道人君今聽我松山歌我歌子和當如何若使兩人婚嫁畢相期五嶽更婆娑眼前富貴安足多

哀上巳

哭王母也

吁嗟吾生何坎坷祖母望八遠棄我有父中道蚤見背孀孀衰經侍靈左從此上巳泣臯魚清明寒食淚同墮生存不得享鼎烹死後罷社靈焉妥

觀葉紫賓明府南郊校射歌

八月仲秋秋宇淨旣望三日風始勁君侯有令角羣材丁男隸卒咸奔命城南河外多平曠豐草青青沙綿綿蒐苗正及騶虞節校射何殊矍相田泉州使君才無敵親提銳

師拯焚溺顧視君侯信人豪手拓弓弦作霹靂却向馬首
前致辭躬擐戎服帥熊貔李愬橐鞬迎裴相此意要作愚
氓知君侯本雄才平居勤訓練部下百十人人帶弓箭
步箭伸猿猱翻身正中鴉鵠面馬箭摧月支紫騮飛鞚如
掣電使君驍騎更稱強觀者如堵齊稱羨吾聞錢塘此日
稱潮日萬弩千鏃潮頭立祇今軍聲何喧囂挽弓射的如
射潮自是君侯膽略殊能牧吾民捍吾圉借問君侯何里
姓何氏武林人氏葉大夫

方爾止有姬名鶴胎者將放之戲作鶴吟二首冀爾
止之不能忘情也

知君酷嗜是詩篇尤喜唐時白樂天惜別馬猶增眷戀傷
離鶴亦動悲憐如何欲送人中鶴縱得乘軒意惘然
白傅老年情尚在君今未老豈無情儻堪相伴還畱住必
欲長拋任遣行祇有些些惆悵事耳邊難捨咏詩聲

看花歎

西隣主人有名花年年花時矜豪奢置酒上坐無他客皆
言七貴五侯家五侯七貴更番至朝出倒屣暮擁篲恨不
傅粉兼施朱爲花語笑增百媚花裏行觴起勸酬鱸鯉魚
羔醉不休蝦腰蜜舌乞顏色花若有知花代羞可憐朱欄
鋪瑤席可憐赤日張文幕不是愛花護惜深防他花萎無

來客君不見花開爛熳有謝時倘逢風雨一朝衰年年花
下看榮落富貴冰山知不知

王屋山歌壽王太翁

徐州守王
吉士尊翁

王屋山高高摩雲嵯峨直與析城分中有幽人抱潛德少
微一星光氤氳君家青緇盈篋笥種槐果遂平生志鳩杖
佇膺綸綍榮魚緋且作斑斕戲祇令謳頌滿彭城爭願父
母康且寧更祝父母之父壽無極花輿到處皆蓬瀛君不
見鶴飛來自雲龍麓寓客能歌鶴飛曲令子壽親復壽民
南極年年照王屋

觀吳臨垣明府所藏宋張擇端清明上河圖

汴州清明競上河汴城內外遊人多河邊隄岸兩相向寒
裳連袂踏春莎昔在有宋全盛年朝野寧謐除煩苛誰爲
此圖繪太平張君擇端手摩抄彭城吳公示此卷層層裏
折如卷荷纔展半幅豁心目柳隄花曲何逶迤其間人物
皆盈寸來往絡繹肩相摩或行或立或負戴或坐或臥或
婆娑或擁香車隔紫障或控金羈鳴玉珂或聚兒童相嬉
逐或扶筇杖髮皤皤或放鵝鴨戲沙渚或驅牛羊上陂陀
或挈遊伴聽黃鸝或迎田祖伐靈鼉或爲儻緝角觝戲九
門磔禳如行儼或羣輿隸擁官長行行如聞吏怒訶或共
藉草相比鬪或獨騎驢潛吟哦或上塚回行踽踽或醉而

歸舞傴傴河中檣帆更不定或去或來疾如梭或去乘風
篙櫓間或來牽挽虞蹉跎或入蘆葦淺叢中漁翁得魚擲
漁婆或逢簫鼓來中流長年穩坐柁微拖或數舴艋相抵
觸或兩艨艟竝經過或榜船頭號軍餉或插黃旗署官齎
遊人自遊船自行不覺已到帝城阿城中店舍看不足富
埒陶白貲程羅五都之市百貨集欲載奚止千橐駝最後
漸知皇居近龍舟鳳舸鬱嵯峩朱簾錦纜闐無人清流汎
汎動微波令人想見舟中人朝烹百鼎夕千娥我閱此圖
三太息汴京風俗應無訛東陽相國有跋記虞集危素爲
詩歌皆言宋末久流落張著得之最軫軻因思仁宗真宗

時聖明在位無偏頗民俗康樂財力阜年年社酒朱顏醅

疇生厲階失此景坐令神州尋干戈汴城風物無今昔一

朝頽敗自宣和五國城中莓母生如此寒食清明何徽宗在五

邑城清明詩有云莓母初生
認禁烟無家對景倍凄然自古興亡皆如此使我掩卷

淚滂沱

同李佳木孝廉登奎山塔有作

平生觀水好登山置身百尺聽潺湲彭城東偏山不足幻
出浮圖撐其間濁浪混混落復起秋潮挾雨天連水回頭
却望黃茅岡日車一線山銜紫李生好事輒先登予亦握
衣最上層舉手直欲捫星漢涼生兩腋風稜稜君不見劉

項事業等飄忽韓蘇聲名亦泯沒與君倒指數興亡惟有
黃河流不歇

梁縣行

出門半日苦秋熱怒風揚沙氣哽咽頗愛微雨灑塵埃奈
何三日雨不絕手無溼備衣霑濡水深泥濁馬蹙蹙舒桐
店舍湫且卑人馬同宿復不潔今朝雨止過廬州梁縣沙
乾見車轍從此家家有上房僕夫牽馬東西列只是北方
粳米無麥餅豆湯安可餓

送方爾止之兗州

淮西山人工詩篇東西南北年復年問君底事遊弗倦祇
爲青山無買錢中秋歸自兗州署孟冬復出何匆遽竭來
纔登太白樓揮鞭又向兗州去君有故人余中台政聲流
溢洛河隈將往從之道修阻且經李署傾尊壘秦淮渡口
青溪曲梅花新釀盈尊綠哺雛軒裏抱雛人望爾歸來早

種玉

爾止卜居秦淮
顏其軒曰哺雛

濟上行贈吳蠡遊

濟上寒河霜結冰官齋蕭槭風稜稜同遊賴有二三子吳
生風節何峻嶒自云阿翁捐賓客廬居正好探墳籍祇爲
女兒烏鳥悲却輕千里遠行役雖然讀詩廢蓼莪高堂有
母髮婆娑焉能鬱鬱久居此行將驅策還山阿我聞此言

三歎息君家兒孫滿親側爭似孤生寡弟昆欲去尸饔安
可得

維揚行送趙五絃之任南安

維揚俊人饒才略釋褐來佐東魯幕舉笏能驅殿上蛇褰
帷但載琴邊鶴由來折獄最稱難詩書法律持兩端廿七
州縣治尤劇君獨翛然刷羽翰以茲海嶠騰水譽祥刑屢
入山公疏如何上賞失循良一麾却向南安去南安舊有
綠陰亭槐堂亦以此命名宦海東西信有數安知非卽兆
此行君不見安西司馬有謝奕胡牀大笑惟岸幘又不見
江州司馬白樂天香爐峰在宅門前自古才人多散吏南
安山水佳麗地勸君有酒且賦詩等閒莫下青衫淚

槐五絃曾題
其堂曰綠陰

老鸛行

任城官廨棠陰敷蒼栢古槐十數株方春風日正和美上
有老鸛羣飛呼愛其羽毛潔如雪順風揚麾謝增巽吳生
見此忽歎息此與吾家老鸛初何殊吾家園林雖僻小喬
木千章宅一區昔年有鳥來翔集非鸛非鷺亦非烏翩然
兩鸛構危巢一雄一雌口卒瘁朝啣枯枝向空谷暮啄泥
塗來江湖春深抱得雛五六仍噉鱖鯉爲之舖巢中居然
有塘坳養魚引水水不枯阿翁扶杖立柴門閒看羣雛試

羽足懽娛雖有兒童探鷄卵時時閉戶禁樵蘇彈指俄經
十七載飛來飛去無時無記得前年三四月竭來暴卒如
豺豕自言身是羽林兒懷中探出銅虎符官家弓弩射不
足採取翎毛飾僕姑此間老鶴傳聞久彈指不用少踟躕
阿翁斂手惜不得退與兒孫暗嗟吁此鳥依棲殊不惡二
朝鍛羽誠何辜隨爇瓣香向空祝上天仁愛願保微禽軀
未幾一丸中巢樹母子摧拉直斯須雄者驚起奮翮去惟
有雌者俛伏護其雛再丸三丸身不動雄者旋欲下天衢
嗔然一擊霜翎落萬里雲霄尾畢逋健兒拍掌笑相賀懸
知其雌命已殂一兒東厨索酒食日午守坐至日晡一兒
上樹窺巢穴誰知其雌仍與羣雛俱臨危若知禍將及翹
鞞口噤聲嗚嗚顧謂此鳥良可憫安忍偏側乘危途擲弓
拋彈出門去吳公長者洵非誣自非積善有餘澤此鳥焉
能免於屠須臾風止林園靜坐見其雄復來相煦濡我聞
君言益長歎願將此意告吾徒兇人一念偶感觸豺狼立
化爲鸚鵡可見好生本至性不爲雀啣玉環魚報珠獨怪
人與人處藏機弩覆巢毀卵胡爲乎遂使此輩有仁心公
然賢於士大夫

吳生謂
蠡遊也

孔子手植檜歌

孔子廟前手植檜枝葉雖枯根幹在霜皮徽纒苔蘚多生

意隱躍膚文內其初手植本三株自周迄漢永不枯兩株
贊德殿前立一株杏壇東南隅永嘉之初始枯槁再榮再
枯關世道如何沿至貞祐間三檜焚燬俱莫有幸有聖孫
收之煨燼中携來京輦授梓工雖然刻爲聖賢像殿前壇
側徒春風又八十年根傍發移向杏壇還舊窟真人應運
將有期生意那能不鬱勃胡爲弘治廟復災此株亦僅存
根荄鐵幹盤拳作龍立屹然不受風霜摧我入廟門一再
拜細看此樹幾千載不見聖胤日蕃延至今六十有六代
吁嗟乎聖人手澤在詩書呵護草木特其餘區區一檜且
不朽吾不知六經流傳更何如

陋巷吟

魯城城東芳草萋牛馬糞邊門戶低云是顏子所居巷古
陋巷字長標題破坊傾欹蟲蠹蝕猶傳當日蕭條色要知
所樂非陋巷別有曾懷不可測君不見烏衣門巷鳴珂里
轉眼縱橫人不識曷若此巷魯城東千秋萬歲無終極予
家亦在蓬蒿裏僻巷短垣何偏側却爲貧窶憂不堪年年
東西與南北欲居陋巷安可得吁嗟哉欲居陋巷安可得

少陵臺歌

兗州城中西南隅有臺巋然臨通衢憶昔少陵方年少南
樓此地獨臨眺昔爲城樓何壯哉至今倏化爲荒臺陵谷

千年有變易詩篇勒石無塵埃雖然荒臺少點綴猶與少陵名不替聞道此城屢破殘臺若山丘石若礪况逢令尹古意多欣然構亭飛簷阿更爲茅堂祀子美令人登此重憶舊山河乃知自古才名無紀極流傳端賴文章力回頭却望魯王宮碧瓦雕甍長荆棘

南池歌

濟州城下有南池當年觴咏偶在茲少陵詩篇永不滅遂使許簿名亦垂舉頭忽見樓百尺賀公會此觴太白亦惟地主好文辭兩公忘却天涯客我今媿無李杜才主人池風樓月興悠哉雖然無賓尚有主莫道此事寥寥空千古

浣筆泉歌

李白狂歌上酒樓斗酒百篇詩不休相傳此地曾浣筆至今泉水長悠悠雖然後人多附會此意猶覺風流在君看近代宦遊人誰肯祠前一下拜今日載酒南池邊明日開尊浣筆泉紛紛俱是冠蓋客何曾見有詩酒賢

時有張具宴客者

同諸子自曲阜歸入濟署作

我來山東意何在厥惟孔林與秦岱秦岱雖嗟道路長得謁孔林復何悔主人更許暮歸時卽遊南池酒樓亦無礙君不見歐陽永叔遊嵩山歸來風雪泥塗間忽見車馬渡伊水乃是錢公遣厨載妓來相攀傳語幕府間無事少畱

龍門賞雪勿遽還主人胸次無塵滓動名亦與錢公比昨
來竟郡聽塗歌處處謳吟滿人耳所惜吾輩倦翮輒思還
低頭又入樊籠裏

清明書懷

寒食纔過清明至眼見春光疾如駛夜來風急雨翻盆官
齋老樹纔生意桐山祭掃處處譁此日壺榼徧山家紙錢
剛挂白楊樹滿山摘盡杜鵑花披雪洞裏人如鶩碾玉峽
前塵塞路更有爽園觀音巖遊人遊女不知數可憐客子
淚潸潸不爲春深好躋攀有所思今遠莫致松山木山洪

濤山

三山皆先
人墳墓處

登太白樓歌呈方蛟峰僉憲

君不見濟寧南城城上頭尚有突兀縹緲之酒樓在昔賀
監宰此土手招謫仙來宴遊謫仙謫仙天下士豈肯沉湎
老糟丘盛年不得蚤柄用徂來山中秋復秋自非痛飲酒
安解壯士憂所以天子雖召見日與酒徒共沉浮心傷楊
李狐鼠輩下視貴妃力士如俳優鴻飛冥冥謝增弋拂衣
歸去不可畱我今亦作任城客緬懷高風意猶昔謫仙生
時夢長庚吾生又復夢太白吾祖因以白字之欲步芳踪
每踉蹌主人自是季真流招我登樓眺空碧笑謂主人聽
我歌自古才名不相借焉知大羅仙一謫不再謫我能濡

毫學謫仙爲君作記題廳壁亦能把餞問青天今日爲君
飲一石

讀韓文公瀧吏詩有懷石二孺明府

時左遷
潮州幕

潮陽自古遷謫地蠱瘴腥風真差事三復昌黎瀧吏詩使
我南望揮涕淚昌黎貶去路八千猶官刺史擁城專嗟君
亦自秦中去更欲折腰刺史前

齊然四以長歌見寄賦此答之

有客遠從潞水至口傳故人念我意曰有數子汪李齊

汪惟

齊李士雅
齊念修也

最後彷彿聞君字我謂三子年來客臯城君從

何處識然四聞渠春明溯毘陵旦晚拏舟來此地客言然
四館予家花雨三春擁絳紗每逢風晨與月夕嘖嘖故人
天一涯有書及詩遠相寄開槭拂紙如雲霞讀罷君書吟
君句廿載交情託毫素上言避地走江東蛟臺樹幟文星
聚下言里門壇坵多畢竟新人不如故其餘磊落數百言
慨歎期許見情愫報君書札答君詩我詩亦與君同辭少
年意氣喜新識老大心情懷故知安得兩無官逋與私負
歸來倡和共銜卮即使終身坎軻心亦足區區草檄傳經
徒爾爲

買馬行

頻年遨遊大河北歸時買馬壯行色雖不善騎愛神駿輕

騎乘風直瞬刻今者言歸自山東十金買馬連銜勒初謂
此地馬直廉豈知我買反不實背骨隆起如駝峰肉疎筋
緩老無力稍加鞭策輒騰跳卽復緩行亦顛踣舊鞍破碎
敗且薄雙髀擁腫與馬逼中夜肢體生楚酸驚覺欠伸難
轉側因思去年客彭城萋亭李子性若偶相識是時我亦
遊興闌君遊較我意更亟見我騎驢赴歸途賣馬僅許酬
半直雖受半直猶愧惶更贈以鞍情無極自言苟非歸無
資解驂脫贈明胸臆君方鄉舉未爲官駿馬雕鞍難可得
感此古道不能忘一路清風誦明德馬馴不蹶亦不驚十
日安驅到鄉國一年遊橐輸一年去年馬亦令人憶

石印山歌壽歷陽劉用之先生七十

石印山前紫氣翔少微一星南極傍老而好學卯金子藜
火青熒多光芒琢成詞賦振金石火齊木難堆琳琅蔚爲
醇儒湛經術方聞有道聲騰驤蚤年父病剖肌體中歲兄
訟傾篋箱至性孝友都過人豈獨文譽馳四方晚乃學道
棲靈素方牀竹几靜焚香阿兄八袞踰大耋弟勸兄酬誠
敬將阿婦名家嫺禮法華髮掩映搖明璫阿子阿孫紛蘭
玉堦庭駮駟羅成行一門以內卽蓬島緜笙海鶴徒荒唐
今年覽揆稱七十遐邇人士競趨躡魚箋汗簡遠投贈郵
筒闐咽高士堂噫嘻高士壽且康譬如旭日升扶桑焉用

文辭祝無疆惟德與福致禎祥有厚積者必厚償俾爾子
孫熾而昌年年花下進壺觴長筵引滿渠未央

桂集卷之九終

木厓集卷之十

七言古三

捉船行

捉船何者裝官兵府牒纔下官吏驚官驅快馬欄江截胥
隸早向江頭洩大船連夜趁順風小船怕捉沈水中却勒
保正沿門報搜得桅篷私上號官法愈嚴弊愈滋得錢便
放拚受笞可憐莊戶愚且直自恃小船裝不得手裏無錢
願見官見官官亦被吏瞞問名編號入船簿口不敢言心
暗苦急覓篙工白送船臨行貼與十千錢

賣稻行

我家世業惟田租蘆草無洲魚無湖雖不畊田與農等稻
賤與農同悲吁往年稻賤猶可賣官了稅錢私了債今年
稻賤賣不行千錢十斛買還退私債祇今任人催惟有官
糧疾如雷叩門更向錢家借聲聲賣稻人未回吁噫嘻稻
若可賣吾何有雖無擔石餘升斗山城百貨皆流通聽說
賣稻便搖手江邊老人偶入城又說捉船裝官兵笑我癡
心望賣稻典衣鬻釵胡不早

馮姬歌和宋牧仲

卽用宋原序

單父朱子有姬馮氏吳人也美而慧不幸早歿素所
愛鸚鵡與鶴亦相繼歿朱子悲之徵詩海內予爲作

歌附諸樂府

江南女兒顏如玉辭家遠嫁驅黃犢鈿合粧成賦玉臺錦
纏買就來金谷一從春雨鎖歲蕤鎮日深閨行樂時眉添
螺黛朝臨鏡手擘烏絲夜寫詩閒來偶向芳園憩徧選珍
禽憐清慧教成鸚鵡語畫梁親調文鶴舞朱砌鳥亦有情
得所依相呼相傍不相違怕驚曉睡低聲喚愛伴秋遊刷
羽飛自是華軒樂事侈白首青春長如此絕代佳人馮婕
妤多情夫婿朱公子誰教紫府召飛瓊一夜西風返玉京
海上虛傳不歿藥人間空有悼亡情雖然美人歸黃土鸚
鵡能言鶴能舞月下猶疑素影來夢回似覺紗窗語却爲

主人淚痕多也逐芳魂葬薜蘿自古美好巧慧不長久朱
生朱生可奈何

寒溪篇酬贈樊海逋司理

君不見宋蘇學士謫黃州拏舟日向寒溪遊寒溪幽邃人
罕到盛夏時聞風颼颼先生解組歸丘壑家在黃州無住
著卜居却傍寒溪邊登高便欲招黃鶴武昌縣裏多簪紳
幾人得似先生貧閉戶肯容題鳳字著書一任長龍鱗却
憐風雅何草草摧陷廓清功不小問字直窮亥豕訛研詩
更覺敲推好我來楚澤采芳蘅謬許同調語縱橫酒闌莫
話從前事道在交矜身後名看君眉目淨如練飄然海鶴

凌霜霰何須鼓柁問寒溪見君如見寒溪面

曹確菴歿孝歌

楚國頻年多火災風捲烈焰成灰堆延燒人命如草芟曹
子有父老且病侍床經年勤溫清喉聲鼻息倚爲命冬夜
火起徹天紅解衣負父赤焰中再拜呼天天返風雖能救
父離床蓆驚悸餘生病轉劇焦頭爛額終何益可憐父歿
子心悲強起呼父父不知長號一聲竟相隨父獲考終子
死孝親知來賀莫來弔地下相逢應大笑忠孝祇求心所
安形體潰爛名行完處常容易處變難吁嗟乎前有曹娥
後曹子一焰火兮一赴水芳名千古竝青史

余山人画山水歌

山人足跡徧天涯登山臨水不知疲投老歸來赤壁下厭
說人間有画師曾中無數好丘壑典酣落筆自神奇遺我
一幅跡如掃丹青不著居然好石梁斷續水潺湲峰巒深
處恣幽討樹頭風葉似寒鴉欲飛不飛堪絕倒此中有人
足風流飄然嘯傲凌滄洲我欲作歌轉相贈我歌山人爲
我謳勸我携歸掛茅屋日在烟雲最上頭

觀曹尚白草書歌

古人運書在筆先往往落紙有奇致漢晉以來各專家鍾
繇索靖不相賜我愛曹子書最佳細觀莫能名一義自言
濡首墨池中叢會古人諸法備季冬晝日大風霾手指凍
瘃不輕利欣然爲我吮霜毫懸腕疾書等閒事隔夜飽研
墨瀋濃滿床冰雪粉牋膩忽如落石墜懸崖忽如怒鷗起
平地忽如老樹挂藤蘿忽如峻坂馳騏驥忽如潮聲夜半
來連天澎湃風雨至真氣溟滓走行間蟲蛇踉跄龍鼉鬪
我觀曹子心手閒口答耳聽了不異瞬刻揮殘半盃漿小
童伸紙郎君侍一任旁觀羨且稱何生無語窺筆意問君
底事不知疲通身神力注右臂草罷亟傾酒數杯顧視曹
子頽然醉更許爲書天馬歌適勁之中藏嫵媚愛君筆底
拖枯樁釵脚漏痕等遊戲安得鵝溪千尺絹爲我十丈逞

一字

索獻子画竹歌

画竹不必求工似但得竹意者爲是眼中画師庸且熟吾
愛黃州索獻子獻子侗儻善古篆點染琅玕特餘技偶將
鏤雲切玉手画得三竿殊可喜一竿青翠濃欲滴兩竿瀟
疎淡如水非關筆下特淋漓自是胸中無塵滓聞君別號
曰蒼篔分明寫照瀟湘裏使我忽動故園思草堂竹色應
如此歸去懸置草堂中堂上堂下差堪比懷君只合對此
君我若呼君君唯唯

壽方繡山民部六十

鳳凰臺上佳氣浮鳳凰臺下人烟稠中有大隱含香客閉
戶煮石秋復秋問君底事娛朝夕長庚偶向人間謫春雨
勤翻玉斧書秋燈愛檢蓬壺籍憶昔長干聯席時草堂文
酒共追隨一朝起草明光殿十年宦蹟銘鐘彝抗疏歸來
種花柳清風不受塵軒誘香山况有子讀書彭澤何須人
送酒自是林泉日月長餐霞吸露如瓊漿我觀君自懸車
後髮轉鬢黑身轉彊從茲七十八十至百歲鬚眉更與今
朝異勸君有詩有酒足長生等閒莫作兒孫計

劉家口渡河歌

北風吹日日無色彈指驅雲蔽天黑客子騎驢立高岡望

望黃河渡不得河邊飢鳥向我啼引我驢足入蒿藜遠見
渡船不見岸蒿藜盡處青帘低睢陽刺史馬千匹買向榆
關知幾日一朝盡驅渡河南大船小船去如疾紫衣貂裘
亦壯哉渡河無錢任去來下馬索酒不問直上馬一鞭如
風雷人馬渡盡僕夫喜急牽驢耳入船裏提刀在手彼何
人不知是兵是舟子搜盡囊錢不滿千一人不得先上船
可憐蹇驢三頭跛且卷要代千馬萬馬償渡錢吁嗟乎朝
廷權關有成例猶恐掊剋滋民厲誰遣汛兵守黃河新來
忽起黃河稅

朔風行

我行千里入中州夜半風號晨不休下馬待渡至日旰傍
晚始渡黃河流朔風吹驢驢倒退白晝昏霾雲靄隳聲聲
作陣撲面來霜刀刮骨水澆背憶昔驅車入濟寧買裘不
得空伶俜故鄉朔風亦凜冽不道此寒身未經乞火田家
黍糝溼兒童急抱乾柴入背風燒煙煙不飛病僕呻吟暗
垂泣須臾火盡煖微回似覺風勢亦小頽登鞍纔出荒村
口揚沙拔木仍喧虺口噤眼閉淚如水僕夫欲行且止止
咫尺不得抵陶丘行路之難難如此

憶昔行贈何願如

憶昔讀書桃葉渡何家亭館足花樹樞衣進履大司空

尊世

父大瀛 翩翩公子皆能賦無何萍梗各西東青溪楊柳渺
先生

煙霧頗聞雙壁蜚文譽天咫惟重錢亦友王暄文二子託情愫

今來山左訪舊遊邂逅逢君如親故應為兩世愜情親孔

李通家匪朝暮老親夜泣有餘悲賤子行吟罕佳句何來

揚扨數百言輕將瓦缶比韶護願如讀老母詩及拙集賦五百言見贈念我

僧寮客况寒望衡對宇常懽聚牆頭濁醪那計巡西隣果

核不知數感茲纏綿古道存殘年不忍詢歸路安得更要

二仲來長枕大被抒平素

美人舞劍當杯槃舞歌和張師石

美人胸貯峨眉雪等閒作使芙蓉鐵書生終日弄吳鉤鬼

物疇能一撇捩三寸凌波二尺圍與郎相約爭纖微砉然

拔鞘迎風出滿堂凌亂生光輝一鈎新月杯槃小迴旋作

態腰肢嫋弱腕橫拋匹練飛全身總被冰花繞暗將星眼

覷賓筵幾人言笑幾人悄喜異哉有如月裏嬋娟微雲掩

金背蝦蟆光閃閃又如電母簷前掣流電滿身是電看不

見玲瓏碧藕水晶盤劍耶人耶環無端一舞燼花落再舞

三舞霜風寒舞到上下一線光轉急驀然捧劍當筵立四

座無聲忽笑喧看取羅衫溼未溼

無魚歎

我家住近大江邊四時不斷魚新鮮孟冬十月河水涸家

家拉網撐漁船裝得魚鮮入城市大魚小魚多且旨玉椀
高堆雪腦肥霜刀細割銀鱗紫松柴爛煮蟹黃香老饕未
熟先偷嘗魚腸肥美魚子滑金盤凍就琉璃光禦冬更切
銀絲縷釀成椒稷甘如乳侯鯖婁護不爲珍龍鮓茂先安
足數今來山東恒苦飢魯酒旣薄魚復希老妻撥火應相
念酒熟魚肥胡不歸

湖南草堂歌爲許子綏人賦

許子重修草堂成會予有齊魯之行未及飲落作此
寄之

許子家住湖水傍因以湖南名草堂卜居城市猶不忘先
人堂構遙相望草堂歲久多頽唐破壁敗棖良可傷一朝
修葺費餼糧短衣雜作蒙風霜時維孟冬月載陽喜聞四
壁重輝光君才自足任棟梁廣廈千間分所當胡爲拮据
歲靡遑老屋數椽不得將勸君安貧守故鄉坐擁臯比書
滿牀弟子傍立東西廂春陰夜火書聲長暇時抱女戲提
筐出登講席入由房大婦小婦同翱翔祝君新年無他彊
老大樂事惟弄麀堂前拆去當門牆蚤覓桐梓種成行更
須環堵插垂楊莫斲墻根老筴管秋宵玩月夏納涼召我
同人羅酒漿行吟雜坐無所妨箕踞盤礴成吾狂我亦粗
葺草堂荒飢來驅我走四方使我三徑委寒螿作詩寄君

吾恐惶出門一諾今始償比年不肯索君觴恐君好客嘆
空囊暮春三月整歸裝索君落成酒倍嘗急乘社雨釀黍
梁澆我壘塊百千場

大方雪疇以佳集見示却贈

黃山隱君學道人飄泊江湖春復春手攜冰雪纜一卷楮
敝墨漉存其神讀罷君詩聰明淨老梅鐵笛橫瘦硬賣藥
韓康豈爲貧悲吟莊舄原非病何來高論更豪雄放眼天
地觀虛空語及興亡爭瞬息翻駁萬古開心曾看君命字
特奇別獨向寒疇犁古雪勁骨偏於霜霰親冰心肯逐市
朝熱勸君歸臥黃山雲酒徒詩侶堪爲羣賀監已往不可
得斗酒百篇無人識

三楊篇贈楊聖喻昆季

自有南池與酒樓李杜詩酒擅風流遂使賀監及許簿盛
名併足垂千秋主賓皆自他鄉至或爲寓客或爲吏誰知
異代產人豪不在他鄉在此地此地三楊舊知名鑿坡家
學本崢嶸長才嶽嶽樓頭峻冲度汪汪池水清文章均足
凌班馬一堂枕被研風雅爛熳欲窺花萼樓情親且締鶴
鴒社有鴒社詩刻投我詩篇盈錦囊金春玉應何琅琅悲秋宋
玉聲相和懷秋集把菊淵明吟更長菊花吟豈惟李杜風流再
好客還傾賀許輩澄碧堂前書共攤影白池邊石堪拜信

是此地鍾賢豪三楊狎主領風騷任城唱和久寂寂

前此刻有

任城唱和詩

莫道寓客天涯無處覓

澄碧堂影白池皆因園中雅構

濟寧酒樓醉歌留別楊聖喻聖企聖美郭孚吉月珮

方雪疇張雲生潘允恭高子戾諸子

濟寧歌樓高插天曲檻雕闌大道邊
夜夜燒燈還擊鼓朝朝洗爵預烹鮮
有客有客還鄉縣故人祖帳情留戀
要我登樓折柳條清歌妙舞愜芳讌
一對新鶯嘹唳啼聲聲水調緩還低
似惜羈人歸路遠頻唱陽關絆馬蹄
中有座客攬袂起傷心碧血汚邦水
借問青溪舊院中得有風流還似此
昌啓盛時吾不知過江以後猶堪思
秦淮渡口香塵

動文德橋頭鈿轂馳美人如雲復如玉
都學內家好粧束花紅葉綠罨青樓
徹夜彈箏剪明燭予亦曾從狹斜遊
結客少年輕五侯皓雪叢中鞭駿馬
綵花仗裏踢香毬此時烽火連廬皖
此日親朋音書斷白骨江頭輦鼓寒
朱唇席上檀槽煖至今夢繞白門春
天中佳節上元晨畫船簾幙窺雲鬢
燈市烟花照璧人記得王妍與喬小
青年不怕東風老教師拚擲錦纏頭
侍女賭尋書帶草誰料北兵忽渡河
軍書填委牀頭多民間博選如花女
早被齊驅上橐駝猶幸平康脂粉賤
晚來仍撲流螢扇紅窗小院睡起遲
綠柳重扉敲剝善一朝軍府盡抄名
細馬輕靴入上京桐酒

黃羊誰解慣鷓絃搗斷不成聲縱有幾家脫虎口埋名却
向他鄉走剩得雞皮供老兵可憐馬矢齊窗牖祇今春雨
舊藏鴉尚憶垂楊蘇小家盈盈一水長橋畔知誰曾駐七
香車排門編入居民牒荒園野菜飛黃蝶眼前名妓俱銷
沉何況桃根與桃葉四座聞言慘不舒雙鬟潛聽亦歛歛
若然一奏黃天蕩滿場悲歎成懽呼再拜辭君歌且歌自
古興亡皆勃忽一鞭馳去傍河滄要到南陽日未沒

節孝篇壽齊母倪孺人六十

紹興守羣玉先生之叔婦吾友念修秩斯之母夫人
也

秋風笙鶴何喧闐華堂引滿鋪長筵皆言壽母節孝全聽
我長歌節孝篇汝南門第簪纓連擇婦名家主豆籩鹿車
初挽却花鈿希鞵鞠脰尊章前洗手厨下擊肥鮮鱸鯉魚
尾蒸菹肩會稽太守無一錢母能操作諸婦先無何中道
隕所天霜晨月夕咽哀絃繞膝三珠雖翩翩中更喪亂多
迤邐抆淚教兒讀遺編栗玉寒水節彌堅堂上阿姑與周
旋夜火機絲宵不眠有娣有姒非不賢母曰執順婦所專
雖處孤貧禮弗愆中歲長齋學棲禪魚音梵唄吐青蓮誓
將茶檠慰黃泉青春矢節至華顛四十年來膏火煎母德
如此算自綿祝母眉壽猶彣彣何以報母雙鳳騫入告悖

史彤管宣烏頭綽楔榜門邊又何報之見曾玄瑯環瑜珥
紛藍田扶鳩下堂雙手牽今朝獻壽秋花妍郵筒遠邇投
華箋丹青銘勒金石鐫齊生與予交諠偏若母吾母何殊
焉每懷烏鳥交相憐吾母六十有六年生子如予曷足傳
齊生齊生子勉旃彈指先予早著鞭歸視霜帷鶴髮鬢節
孝之報非偶然

申端愍殉節歌

諱佳胤北直永年人官太僕寺丞
甲申三月十九日京城破投井歿

前朝末造遘陽九神京三月倏失守羣鼠上殿攫金錢驅
斥公卿如驅狗罔丞司馭亦閒曹悠悠蒼天誰執咎維嶽
降申三輔豪急而獻策猶不偶公出巡近畿聞居庸關
破入陳戰守策不省久

識熊丸耐苦辛臨危再拜謝太母

公少孤事母太安人至
孝顏其居曰和丸所著

有和丸
等集

君亡與亡分所當身且不恤家何有血灑萇弘碧

水寒鼎湖一去疇甘後雖然義命不可違亦欲君親兩無

負

公貽書長公
有義命等語

鯁生曾紀殉難編熟公姓字良已久

予向
有甲

申殉難編載
公歿事甚詳

何期 昭代錄忠魂榮被泉壤勒鐘卣

順治
十三年

年賜諡賜祭
復建祠永祀

公有長君孝且賢

息盟

能讀父書守甕牖叔

季聯翩入金門

觀仲
隨叔

卽看次第拖紫綬努力史才匪異人

纂修還待鳳樓手首列阿翁冠幽忠日照汗青光不朽

伊蒿篇爲許子志先德也次還山韻

蒿墩大姓凡數公君之先翁名穹隆德被父老及兒童閭

黨誦義無終窮賊來遍野如蜚鴻氣吞江北日無桐阿翁
負母湖之東湖上殺人湖水紅一日數徙蒲葦中所至輒
脫豺虎叢神若告之人謀同亂後四郊倉廩空彌望但見
蕭與蓬誰其食之麥有體賴翁菽植歌芄芄許子追念先
人功自傷貧賤業未攻上書無能達帝聰表翁孝義古比
隆我亦早孤怒予衷見說若翁猶吾翁朗吟伊蒿篇一通
方子詞賦今宗工君家先世德義豐譜牒殘燬半消融君
獨修之何其雄汗青日射光朧朧有子玉樹方青蔥佇看
碑表摩蒼嵩千秋萬禩傳高風

東臯草堂歌爲李芥須賦

東臯草堂在何許乃在烏石之岡三墩之墅東臯草堂築
者誰云是隴西之喬龍眠之遺龍眠舊有巖棲者君家三
李擅風雅問君底事卜幽居不愛深山愛平野君言最厭
是虛名龍眠之名曷足榮林泉隨地原不乏風月迎人皆
有情偶然小築藏丘壑前對遠山後負郭老梅一株竹數
竿如此幽居良不惡君嘗宦遊嶺海東盡室飄零烽火中
日斷中原惟落日心傷故國徒悲風爾時東臯莽荆棘欲
卜一枝安可得喜今猶栖半畝宮回頭往事那堪憶昨聞
草堂初落成隱囊皂帽受風輕騎驢時入華陰縣扶杖閒
攜甯氏甥勸君安坐衡門裏莫羨他家林園美好葺簾幃

待孟光預期紙筆遺通子君不見午橋草木牛羊稀平泉
人去花石微不如東臯草堂足千古管領春風無是非

憶昔行贈劉淑甫民部

憶昔先朝重豸繡特簡我祖巡山右但知執法屏豪強偶
爾采風升孝秀君家太公方妙齡詞源傾瀉如蓬瀛眾中
崔立陳驚座我祖拔之冠諸生顧語州牧此神駿一朝千
里風蹄迅公亦深銜知己言果然再出摧文陣無何宦轍
各分馳我祖不言家不知遙遙此事四十載吳山晉水徒
天涯豈知彭澤歸來早君又彈冠稱國寶延水爭傳小范
名嶺南盡道吳公好

公初宰延川尋除連州
守今拜戶部尚書郎

可憐江北罹

烽烟魏公孫子今蕭然却看旋馬廳何在縱有縫裳葛幾
穿感君懷舊敦古義羊城幕中談往事殷勤曲盡解推情
此道今人如土棄我來燕市春風低門前鳳字無人題咏
草何曾逢顧况騎驢不敢觸昌黎君獨爲我增惆悵一聞
姓字趨相訪眼底新知粉署多細談故舊神偏王自是孝
息君獨深推分世講到孫曾不見鷓雛又鵲起

令嗣方于
人成均于

門世澤方繩繩爲問太公年幾許倚閭可憶斑斕舞書來
倘訊魏公孫莫言有客蹙躡長安門

母大人七袞初度賦以志祝

母昔生兒年二十不覺春秋已七秩回憶劬勞五十年年

年爲兒懷憂恤兒年五十尚無成母今七十心轉勤朝拜
瞿曇繙貝葉夜瞻星斗爇香芸暇日倍縈兒女慮一刻九
迴去復駐屈指何人知母心何人知母含悽處兒最不孝
罪通天半生總爲虛名誤所幸母能見道真土苴富貴甘
荼辛不爲兒賤生憤懣不爲兒貧起怨嗔但願讀書留種
子孫枝葉葉能荷薪母族名閥本尹姑母德通都比鍾郝
母才更復凌謝張詩文流傳森噴薄卽今海內稱大家千
載峻嶒松聲閣江也安能頌母儀累詞贅幅徒紛披惟求
母健益加箸子孫百歲仰母慈麗辭頻長雞林價淑範常
爲士女師秋風桂萼香初剖兒獨希鞫祝壽母核進安期
棗似爪蓮開太華船如藕與其潦倒舉場蠟三條何如戲
舞堂前一杯酒

送張夢敦庶常還朝

銀漢瀟天宇金風淨陌塵雙旌國門外祖送闔城闈借問
送者誰氏客詞垣才子文章伯與君同學二十年寧無一
言贈君別憶昔公車偕吏遊文采翩翩照九州射策高題
雁塔上承恩直踏鰲峰頭書生一旦登華省至尊親政朝
儀整馳封恰值 聖恩殊瞻雲忻聞春日永其如中道廢
蓼莪三年雞骨泪滂沱南陔咏罷趨東觀移孝爲忠可若
何鑿坡虛席久相慶星軺計日赴朝請且喜金閨舊雨多

重矜玉署新槐盛君昔雄文苑苑推洛陽紙價轟如雷承
明游登看起草光芒萬丈凌三台芸窗與我同鉛槧雞林
一出傳月旦行看鎖院秉文衡水鏡南宮倬雲漢往年愛
日思庭闈只今接武夔龍時從此一心報 天子揚顯承
錫方自茲到時秋雨直秘閣四庫圖書恣搜索明年我亦
入長安看君燕許新著作

壽方君都七十

酉岩先生古君子一生坐卧圖書裏早年便懷出世心晚
歲更研學道旨憶昔曾際盛明時射策不第歸田里白纓
湖邊春草生書聲漁唱沸人耳掉頭不顧流俗疑開眼直
與前賢比茫茫舉世一鍾期休那老人而已矣自從陵谷
閱滄桑陶詩一卷常在几春風簾幙燕銜泥秋雨陂塘魚
出水尤憐庭畔牡丹花三月晴和風日美畫紙敲針足娛
年不問山林與朝市今秋暑退天氣涼先生七十行年始
啓柵纔看鵝鴨肥登場且羨稻梁侈親朋歡笑兒孫前共
傾新釀歌燕喜伊余瓠落無短長曾因文字執鞭弭孔融
安敢冀忘年虞翻自謂得知已何以祝君侑君觴洪崖浮
丘徒俶詭惟願湖邊舊草堂歲歲呶唔聲不止借問讀書
者何人酉岩先生古君子

白玉澗歌爲孝烈張公賦

公諱清雅
字玉楚

我聞瀟山張公家住白玉澗崇禎十年罹寇患老翁八十
病在床瀕危不肯鳥鼠竄公曰父在敢出鄉父存與存亾
與亾病則視藥歿視襖誰知賊騎登吾堂公然斫棺齊舉
火忽驚人從梁上墮雙手伏棺泣父屍子屍已仆父屍左
此時天日慘欲昏一子一僕皆斷魂一子十六從父歿一
僕七十報主恩嗚呼寇難以來逢百罹未有全家歿如飴
張氏一門六十口如公父子主僕尤稱奇南昌王子王子一也
作佳傳描畫鬚眉開生面修史誰當失斯人從容慷慨都
堪羨公有長君超載官
慈利令早辭榮乞言海內非爲名分明永
抱蓼莪痛老去彌深烏鳥情至今白玉澗水常嗚咽賴公
一門名不滅子死孝兮僕死忠與玉爭光水爭潔

報國寺古松歌

長安三月疏溝渠黃塵赤汗馳通衢金臺買駿少高價燕
市擊筑無酒徒賤子席帽來北闕布衣不得輕上書稍喜
同志蠟雙屐十日松前一岸幘大松昂昂若龍拏小松蟠
屈如人撐肘腋鐵笛虬穿石罅長古釵苔繡土花碧借問
此松何年栽何人培護却氛埃白頭老僧忘時代但見拳
枝秃幹不受冰霜推陰天似共蛟龍鬪白晝常疑風雨來
我來拜松冠先整空青濕袂鬚眉冷劍花蒼翠拂石欄日
光細碎流雲影鬚頭綠雪不覺寒觸耳秋濤發深省誰開

廟市陳百貨公然掃石松下坐火齊木難發古光秦碑漢
場同坎珂販兒酒肉動成林瘦硬翻遭腥腐澆吁嗟乎長
楊五柞已荒丘叅天老樹委道周易若此松經萬劫閱盡
人間秋復秋鱗老不愁雷火劈鶴飛時見雲烟浮紛紛俗
子揆竒玩幾箇回頭把松看老我窮途懷古懽羨他屈曲
摩霄漢却笑畢宏帚偃莽丹青等閒放筆寫直幹

黃金臺歌

黃金高臺何突兀燕王招賢買駿骨卽今遺址渺難尋荒
烟衰草同埋沒當時好士比龍駒龍駒雖死骨槎牙未必
奔雲與掣電真憑鐵騎蹴黃沙令人重馬不重士叶千金
買馬百金轡但問郭家獅子花誰知徐勉人中驥

觀太學石鼓歌

嗚呼大雅不可作俗書叢蒼如蟻蠓虫文鳥篆去古遠墨
瀋亂滴麒麟駸昆明灰燼爍銅狄瑤函玉笈塵土封伏挺
圖書填馬矢明誠金石堆駝峰尚存此鼓劫火後如魯靈
光歸瞽宗薛劓苔沉半明滅摩挲寒碧空朦朧岫嶸石碑
猶餘古偃師銅盤嫌太工籀文直在篆隸前詎數李斯與
蔡邕吾聞此鼓初潛陳倉野蘇勉紀載貞觀中鄭餘慶寘
夫子廟大觀初年入辟雍金源以後始北徙虞集得之荆
棘叢東坡手鈎篆籀備三百餘字音釋通升庵私淑六百

餘古遠今近安適從瞪曹捫索惜殘缺字凹石凸形龍鍾
石室何人語中散玄亭祇合問揚雄要知自是三代物後
人贗筆難彌縫漪園老子強解事摺摺蘇綽何夢夢神物
出沒自有時豐城寶劍會稽鍾緬維周宣中興日狩于岐
陽鼉鼓逢大會諸侯整六師我車旣攻我馬同從茲九伐
揚神武魚馬鐵戟驅邊烽率彼淮浦命虢虎薄伐獫狁奏
膚功蠻荆來威有方叔江漢滔滔肇敏公千百年後仰廟
筭赫若神人御長風乃鑱貞珉勒鴻績金薤琳瑯交磨礪
史籀珥筆拜稽首印泥劃沙藏鈇鋒年深如虫蝕木葉字
畫迸斷句讀窮高庋太學風六館采芑六月誰比蹤我來
燕臺按遺蹟園橋不暇聽笙鏞拾級再拜璇墀下光芒閃
爍蟠蛟龍周宣往事徒已矣使我懷古胸杵春

寄賀姚龍懷少司馬新拜總憲

霜風昨夜螭頭新鐵輪飛動槐廳春聞道綸扉曾補袞于
今象簡獨批鱗知君雅志陳金鏡兩朝論事風裁勁李孟
時聞長者言姚樞力活生靈命當宁心知救時才四門八
總爲君開纜自梧垣趨棘府更從鳩署領烏臺臺端鯁切
無規避掄才還網空群驥癸丑會試總裁駝羹御宴甫宣傳蕩節
王程旋遣使特旨諭鞞江南果然疑獄賴平亭入告微聞歎息聲
諫紙肯容填篋笥宣麻佇見下延英令子吾家東牀倩長公

注若吾兒亦被紅繩牽好待春明水泮時親入蘭臺看萬卷
時兒子仁樾將赴京入贅

歲暮以一銀錢買徐文長花卉冊子喜成長句

會稽宛委石匱藏誕生才子垂光芒徐生詩文皆卓絕餘
技丹青亦擅場自從兵火劫灰後百年絹素歸銷亡牛馬
踐踏汗卷軸兒童標插換壺漿當時價重推耆宿後來具
體聲華續衣冠方雅陳章侯山水清妍藍田叔繼起仍聞
關與祁誰把殘縑比珠玉畢竟皴染老輩彊雨葉風枝都
不俗老夫晨起厨無烟閭左徵責方喧闐友人遺我一銀

錢

江州葉清聞

准擬償抵負書錢隣家病叟持一束揩摩老眼

口流涎君從何處得此卷水墨瀟疎照湘簾天池翰墨久

零散尚餘碩果存人間借問粉本誰脫橐若耶蓮花刻山

草名高不許權要求與酣翻爲兒甥掃

卷爲史甥畫

石逋老人

李當衡

賞鑒家一見大笑便絕仁四松居士

方還青

辨款識酬

以長句雲烟渺我愛天池畫入神曾貌琅玕數筆成

從父根孫

家有文長畫竹不戒于火

未若此卷劈生紙信腕灑墨皆有情一花一

卉取真致意匠不用苦經營更畱題咏標圖記書法瘦硬

相塘撐吁嗟乎豆酒羊肩亦易具

文長作詩貽史甥索豆酒羊肉

當年一

飽曾難遇我今乍獲如奇珍殘年何惜此孤注歸語見孫
好收藏餓死休教歸質庫祇恐夜半雷電來帝遣六丁取

將去

雪灘釣叟歌爲吳江顧茂倫賦

咄嗟乾坤此何際釣名網利奔如鷺終南捷徑是竿綸股
浩虛聲卽釣餌誰能免俗寶不貪清濁雖殊情無二松陵
顧子獨翛然掉鞅詞壇標赤幟區明雅鄭三十秋力鋤稂
莠闢流議王風蔓草大雅亾栗里讓溪幸未墜豈徒河嶽
洩英靈頗爲中興存間氣

先生有近代名家英華及驪珠諸集之選

下里蛩音

何足稱亦入雷門備鼓吹吾聞先生家常貧醴陵甲第曾
連雲一從百六罹浩劫巾車蠟屐足晨昏瓜種青門誰故
老經談白社祇遺民家住吳江虹橋畔漁村蟹舍春復春

門巷儘容車馬駐林泉惟與鷺鷗群有時烟嵐來几席有
時天水氣鮮新鄴架千篇堪下酒衡門兩版空疑塵興倦
偶然拋書帙葫蘆叢中間垂綸問君綸向何處設絲篔簹青
笠稱高潔不釣志和江上風不釣雲峰湖邊月只愛茫茫
銀海中短衣獨釣寒灘雪鴛鴦塌翼冰結團牛馬蝟縮行
人絕然犀夜入癡羊洞探珠冷擣頑蛟窟睡熟那知柳岸
移饑來但嗅梨花齧渭濱未厭玉璜夸嚴瀨翻嫌羊裘熱
如何千年太白山長鎖陰雲無休歇此日梁園久不開空
負鄒枚作賦才此時龍門不好客遣厨載妓誰追陪幾家
酌酒眞娘墓何人掃石生公臺市朝風波初無定人情冷

暖良堪哀惟有霜灘一塊鐵常伴先生卧寒灰眞珠簾捲
瑤池浪雲母屏翻白玉堆爲我且勸先生酒一杯蘇卿齧
雪守漢節段頰餐雪破羗迴安能提竿但釣雪坐對天日
常陰霾昌黎欲舍沮洳去舜欽猶帶笇箬來大地會有不
雪日釣叟釣叟豈終困風埃

木厓集卷十終

木厓集卷之十一

七言古四

石室篇爲晉陽張二南先生賦

吾郡別駕張侯之兄也

石室滹沱古晉陽其山旣高其水長挺生哲人如鸞凰力
爲衰俗植彞常聞昔太翁病在床浣踰嘗糞伏翁傍夜香
一炷禱窮蒼願以身代中徬徨厥疾不起執父喪麻衣如
雪照空堂廬居三載飽風霜杞床著席雞骨僵日維母氏
安且康焉忍號泣摧中腸朝侍母側夜歸房欲哭不哭心
暗傷有弟四人舒鴈行父書教讀聲琅琅琢成連璧傳青
箱白華南陔堪補亡天祚仁孝烏可量及身俾爾壽爾臧

龍文驥子更騰驤掉鞅菽苑方翱翔公雖未獲登巖廊孝
友張仲足頡頏是亦爲政庸何妨况有難弟腰金章卽今
贈刀懸中梁下車異績媿龔黃佇看明奏達未央温綸捧
出紫泥香孝行傳成傳循良皎然竝爭日月光

讀宿松民頌德政歌爲朱含英邑侯賦

侯名維高四
川保寧人

皖江巖邑松與桐本朝作宰多鉅公眼前瞥見兩曾恭一

來夢澤

謂吾邑
胡侯也

一巴邛巴邛才子今揚雄灑水錦山秀所

鍾自從飛鳥下江東嗷嗷群集哀澤鴻有黍或或禾芄芄
及朞報政年和豐漸復流移起衰瘡惻然緩賦減租庸刻
木爲吏馳郵筒勾攝悉罷訟庭空郊圻斷絕狐鼠蹤夜深
犬靜但聞春紛紛善政無終窮松人頌德公且忠無問白
叟與黃童作爲歌謠聲颯颯其言朴直不求工要皆摭實
鮮彌縫令我匡坐讀一通如聽古樂曼笙鏞古者采詩觀
民風誰謂君門隔九重定有人兮達宸聰播之管絃銘鼎
鐘爲郡縣式俾景從吾桐昔有朱司農桐人至今祀瞽宗
焉知朱公在隣封清操勁節松滋松矢詩不多寫我衷松
人桐人將無同

壽方母辛夫人六袞

崦滋堂前桂林叢有雀翩舞翔簾櫳借問舞雀來何從瑤
池貝闕蓬萊宮我友梅師擅儒宗閨中有婦執甚恭鳴琚

上堂和讎讎鍾禮郝法植其躬梅師巖巖千丈松雙日如
電聲如鐘有時掀髯稱詩雄一飲百川奔長虹夫人操作
坐門東咄嗟奚止辦殮饗令子蹠躩人中龍江夏無雙今
黃童誰其教之母與翁拭目揚顯紫泥封吾聞晉有辛侍
中其女憲英賢且聰夫人明慧堪比蹤才德復與憲英同
八月上澣月朧朧銀河瑩潔纖雲空此時長筵引碧筩祝
母遐筭無終窮如月之恒方溶溶梅師梅師新酒濃西王
母竝東王公年年對月吟秋風

令子謂夏瑞也

壽方叔茂先生八十

先生明善之聞孫家世峩峩通德門少操柔翰凌行輩著
作等身無朝昏作賦居然官屈宋論文直欲見宗元昔在
先朝多難日曾偕計吏排帝閣日擊時艱發長喟上書奚
止千萬言南渡以後不可爲賣官開邸烘西園爛羊都尉
滿都市君獨拂袖歸丘樊四庫圖書隨伏挺六館子弟宗
何蕃雖復需次待一命掉頭不顧聲暗吞是時賤子亦流
寓先後挈家皆西奔回思已是廿餘載君年彌邵行彌停
鄉飲酒禮成故事曠典久廢賴君存君有從子稱雙璧與
吾異姓爲弟舅因憶濟水十年前走幣稱觥誼何敦爲言
明善孫有九屈指惟君齒最尊以此執禮益恐後父事師
事矢弗諉今年八袞神猶王飄然海雀姿高騫一時里老

歡如沸桂叢群從咸騰喧豈獨明善孫罕見天台而下無
其倫我謂君年曷可量虞淵初浴銜朝暎膝下斑爛萊綵
徧階前次第蘭蓀翻歸然靈光砥末俗型仁講讓垂後昆
從茲介壽到期頤花朝月夕堪討論雪橋穩騎驢子背春
山細踏屐齒痕歲歲持螯引長筵與君醉倒老瓦盆

壽何三江六十

門人何漢客
之尊人也

我聞何家大小山能却榮利駐朱顏兄拜常侍弟光祿飄
然棄寘如等閒寥寥高風邈難企誰其嗣之三江氏家世
積善通德門簪纓接武鳴珂里三江先生美髭鬚弱冠操
觚稱通儒服古力能窮二酉揆華才不讓三都中年厭逐

文場隊抱膝長吟環堵內一任世法世爭趨祇覺吾廬吾
自愛有子丹穴毓鸞凰羽儀刷就成文章佇攬德輝翔千
仞一鳴天下稱歸昌先生曰嗜好爲之吾但擁書坐臯比
孫枝况復蘭芽茁足娛晨夕供含飴以此優游追黃綺薄
視功名如敝屣扶筇不覺芒屨寬注籍又從花甲起今年
雖儉薄有收勸君勿憂稻梁謀膝下兒孫足蔗蓀眼前軒
冕徒蜉蝣豈無白髮居高位長筵引滿心憂媿何如先生
樂道復安貧濁酒一尊陶然醉

江州晚泊

北風一夜號不絕船頭撇開船尾折彭蠡湖邊浪似人小

孤山下波如雪朝發彭澤城暮泊湓浦口急水奔下流風
吹船倒走湓浦衰草仍春色青衫不見當年客琵琶女子
怨未消結作愁雲滿江黑

萬里行送姚經三之任滇南

萬里昆明控梁益 興朝王會通重譯君今更向昆明西
天南象郡逢初闢自是皇家恩威殊輿圖盡處山川紆小
儒囁嚅不敢往一鞭叱去真丈夫君才合踏金華省却向
天涯散雲錦碧雞金馬供詩囊青海蒼山飛墨瀋我聞此
地隣南交南交國王曾來朝好爲至尊宣威德還兼太史
采風謠又聞此地桑麻滿漸銷金甲佩銀管喜今盛覽得
相如更無王機擾陶侃君家花萼輝彤庭司寇承恩方明
刑孝廉蹠躐掉文鞅明府次第淬新礪君獨馳傳天南去
楊柳青青識官路結納須盈海內賢經過定作西征賦飲
君酒送君行慈親健飯牽衣別候吏清塵負弩迎到日鋒
車應召取五雲北望卽神京

喜雨歌

男莫啼女莫哭六月得雨年當熟去夏大旱春猶酷雖有
微雨但霖霖昨夜疾風拔林木今朝雨出如飛鏃但願雨
多長禾穀霉衣爛盡心亦足

傾蓋行東許綏人

傾蓋如故白首新昔人感歎良有因人生結交無早晚知
心不論踈與親舉向許君君搖手我曰良是君曰否路逢
貴介謂傾蓋人遇衰老謂白首不信但看今世俗望見車
蓋論心曲不幸相逢舊知交衰殘安足當一目雖然衰殘
曾爲官微倖不作等閒看又或布衣年猶少亦恐其人未
可料惟有年老又賤貧棄之不屑如飛塵今世無如貴第
一次則富厚倉廩實既老且賤豈不窮枉憶昔年論膠漆
聽罷君言增欷歔人情翻覆如此夫爾我于今老且賤莫
怪故人罕識面

臨淮道中念亡妻方氏以是日權厝山莊哀之

卿病已深予入都卿歿浹旬予歸里卿今權厝古唐莊予
又策蹇泥塗裏豈我難停十日裝歲暮饑驅非得已遙憐
夜半出重闔冒雨扶輻雙穉子常年深居不出閨一去家
門無還理我身在北心在南心隨丹旆霜風靡卿曾勸我
納姬侍慮予老病無所使我亦不幸用卿言誰知一室多
荆杞應諳交謫素所嗔故遣煩憂聒予耳不然艱苦已嘗
盡要使後人亦復爾憶昔霜晨山左歸入門泣訴吾其死
君行一月塵未乾妾居一月淚不止明知卿病入膏肓反
泥卿爲治行李卿昔望孫病且革猶思仲婦來一視今幸
有孫且兩週左氏婦亦將歸矣使卿若在六禮周奚至一

人獨經紀雖有外孫三四人知卿不敵抱孫喜吁嗟古唐
非北印吾家累世厝于此九松夜月燐火青母子相對酸
風起遙遙同穴知何年悲君自悲淚如水我爲卿狀乞琬
琰陳君默公墓表李君士雅誄令兄還山更爲作佳傳表
汝懿徽光彤史三十五年眉未開一朝拋却窮愁壘大笑
出門卿勿悲人天極樂從茲始

同友人看菊秋圃贈園叟叟張姓今年七十矣

老人治圃種花木不種春葩種秋菊年年風雨近重陽高
枝千朶出墻屋拚將百錢買秋光有花不恨食無肉今年
結伴看花來霜螯初滿新筍熟我問老人年幾何未覺鬢

斑鬢毛禿自言此地舊作家暗數滄桑失陵谷昔年十七
今七十潮痕幾見上堂塾且喜賣花有餘錢三間五架新
成築堂下何所有繞砌群花馥堂上何所見滿壁圖百福
或疑福字如許多細看乃是壽兼祿老人對花安且閒子
能籌筭孫能讀卽此便是百福人何庸更作他辭祝叟字元祥
堂上挂百福圖

壽族祖懷德翁八十

高賽湖水木山前居人歲歲網新鮮吾宗昔有德軒老築
室其間今百年誰其似之曰三德背負木山面湖側惟翁
最長稱最賢矯然不媿古遺直我昔觀獲橫山傍臨湖喚

大雅集一
渡常相望汀洲風起晚烟細柴門月出漁歌長艤舟登堂
大如掌左挂鋤犁右挂網自言三世尚同居有弟有姪皆
伉爽回思已過廿餘春翁顏如赭髮如銀當筵解勸杯中
月鼓櫂能探冰底鱗轉眼問年已八秩不扶鳩杖惟抱膝
柳陰斜繫一舟橫槿柵齊呼群鴨出何以祝翁稻梁多新
篳熟時助高歌又何以祝蘭芽茁天上麒麟手摩挲恰好
今年修家譜譜成爲翁歌且舞高賽湖水清潺潺照翁百
歲鬚顏斑

壽張氏妹五十

吾有女弟通詩書良人早歿訓諸孤空幃獨處今五十回
憶往昔增悲吁憶昔良人分月日彈指已踰廿年餘廿年
歲月疾如駛茹荼咀藥披荆杞黃鵠歌殘午夜燈白楊哭
挂清明紙敢辭辛苦報所天剪刷雙雛鵬翮起里中大姓
數清河叅政之孫賢且多方伯司馬都貴顯別駕有子登
鑿坡豈有明經後弗振雙雛次第看嗟哦吁嗟乎亂後幾
家能撐柱華屋雕甍非舊主憐汝拮据手口瘠一身操作
持門戶棄擲城南韋杜居買宅依然傍尺五世家良田多
污萊萬頃如雲等劫灰憐汝嫁衣都典盡東歸西贖先業
恢牙籌搯雜刀尺俯笑鬚眉皆庸材卽今婚嫁欣有託
一門真見庭闈樂新婦齊爭菽水將佳兒竝競藍田琢清

磬一聲梵唄完含飴孫放書堂學白頭老兄酌流霞勸汝
濡毫滌硯坐窻紗一日大士畫一幅畫徧百千萬億恒河
沙絹素流傳長不朽優曇涌現青蓮花

東隣歎

東隣昔日何崢嶸朱薨繡柱翡翠屏五畝自賣文靖宅旋
馬曾無太祝廳赤日炎風天未曙移家更儼他人署如何
不及十年期眼見遷來又遷去

小楓樹

小楓樹大楓樹小者翻大大者小當日命名無乃誤世人
沿習多不察童孺到此亦驚顧祇訝小者何龐然誰識大
者非其故小者卽今已十圍吸雨餐風飽霜露向使大者
今尚存更當何如龍拏而虬互寄語過客莫浪傳大楓樹
作小楓樹

送胡邑侯簡上還里

我聞漢有朱仲卿我聞晉有陶士行朱公治桐尚寬仁自
言愛我莫如桐鄉民陶公治桐敏且勤至今樅陽猶有惜
陰亭二公往事亦已久尚存遺愛千年後誰其嗣之鄔與
胡鄔似陶公胡似朱柰何兩侯皆楚產皆以循良遭白簡
我侯爲政更多年深仁厚澤清心版欲知我侯治績優請
聽四郊歌且謳鄧君船避居人挽麴令碑從衆口畱民曰

父母哉樂只士曰師儒哉彼美其嗟輿情借寇難戀侯與
戀鄔侯比走也楊亭曾問奇感侯知遇沁心脾每嗔囊粟
侏儒飽常嘆鹽車老驥疲節孝一時多激賞小人有母蒙
崇獎修乘重登彤管編旌門特賜烏頭榜君不見朱公後
涉大司農嗇夫超拜至三公又不見陶公爲八州都督戮
力王家圖克復佇看霖雨徧寰區誰許荷衣賦遂初獨惜
君行太匆遽籬邊寒菊催君去

自題小像

我昔年少逢明盛羞將青鬢看銅鏡直擬功成將相時凌
烟閣上圖光儀荏苒到今五十六形容醜老存矍目聊呼
畫師一寫神科頭箕踞山人服君不見香山居士題其真
自言神骨山中人不見東坡寫真贈何克亦欲置身山
巖中何况我本烟霞客合伴青松與白石

壽張清菴先生八十

老母七十有七
先生女甥也

昔我先朝全盛日彼都人士盡尹姑先生克世舊家聲儒
雅風流實罕匹爾時明經謁選回一官需次等塵埃掉頭
不就戀松菊龐士元豈百里才惜哉艾年不服政眼看滄
海初何定探囊雖乏買山錢扶犁偏動歸田興自是天倫
樂事多手持一卷嘯巖阿鹿門偕老雙舉案萊綵群娛爭
鳴珂况復一門盛酬唱封胡羯未神都王天祿閣中時到

書辟疆園內堪携杖先生曰嘻吾何求清齋繡佛足丹丘
祇今八十如四十鬚轉鬢黑眉轉修清河吾母所自出少
遊外家學琴瑟齒德最尊諸舅行人比景星與瑞霽走也
言之恐不文也逐瑤池笙雀群願君歲把蒲根酒長對櫺

花照火雲

生日五月初六

王安節手抄予徐覓草貽詩見贈次韻賦會

槐花忽報秋風曉日裏揚帆送楊皞

方甥當時南行應舉予以書寓安節索画

併龔山壬寅以後詩

伏櫪自嗟壯志違山田卧看登禾稟苦憶輞川

畫中詩生綃一幅烟雲渺中散亾後無正聲茂陵老去求
遺草龍眠缺事三百年手闢榛蕪慎甄藻相馬原不問驪

黃探龍肯復尋鱗瓜文章真契爭毫芒安能依違阿夙好
風雅一燈在龔山皇天不憖遺一老玉祭圖書付與誰哺
雛軒戶何人掃珠槃王敦三十年敢云元白吾壓倒楊公
有口說項斯李洞無金鑄賈島候虫鳴秋亦偶爾君從何
處恣揆討我有卷帙盈巾箱今年謬擬災梨棗淡粧不學
世人妍老筆翻愁愠群小讀君長句十年前贈我琅玕胡
不早海內皇甫定幾人君盍爲序三都稿

壽吳左賦五十

少年掉鞅文壇早爾我皆不屑言老一旦婚嫁取次完四
十五十如電掃我昔五十懶上書君年纔及四十餘彈指

亦復稱半百安能對君不躊躇雖然君才豈貧賤早達晚
成均堪羨况有蹠躩好兒郎不數南金與竹箭延陵冠蓋
紛追隨惟君父祖食報遲譬如泰山雲觸石崇朝雨徧人
始知我母眠食近稍損多君堂上猶健飯兩家且戲老萊
衣莫問朝廷誰補衮眼看玉樹盡琳球次第看修五鳳樓
懸知克大門閭日輸爾耆英尚黑頭

壽方子銘五十

蓮池有堂曰連理伯氏仲氏皆榷梓最後始獲與君交乃
在濟陰官舍裏其時君年甫及壯挽弓擊劍頗自喜私心
卜君骨相奇不待四十擁旄矣阿翁本具文武才金昆玉
友齊媿美柰何伯仲皆修文君亦偃蹇踰四紀幾年盡室
墾荒萊躬督僮奴課耘耔歲收萬斛滿倉箱取完租賦供
禋祀更爲春酒介眉壽堂前白髮饒修滄使君生當兩漢
時一晦三眵亦爾爾功名早應力田科豈讓趙過與蔡癸
有才如此老田間徒令庚桑稱畏壘君昔每懷宗祏憂今
已居然連抱子且喜岐嶷非常兒將來奚止掇青紫君有
宅相吾妹夫謂左賦也同年同日挂弧矢予旣爲詩壽吳郎復
寓長歌陳筵几惜無伯仲共勸酬尚有蘭蓀接堦祀所願
兩家鳳毛豐並翔天路耀鄉里此舅此甥對舉觴予亦大
笑折屐齒

蜂來篇爲綏人賦

湖南許子天下才踰艾門未懸弧矢從前非不頻弄璋春
雛常墮鳩巢底我曾摩頂作詩歌轉眼蘭苕委流水何況
人種復銷亡兩女號咷酸貫耳今年買妾練湖邊榴花照
水清瀾瀾香車入門繡幌開親知走賀醉芳醴漫空蕤蕤
彼何聲飛集簷牙密如蟻兒童噉踞報蜂來蜂來似道人
家喜此物生長在山村等閒未肯到城市舉群忽來欲蔽
天合家謹噪奔錯趾篋箠數紛持將齊入箴籠不移時

叶上

紙切天其或者告之祥子姓繩蟄端可期

叶巨

許子顧我

笑復歎前年神已授意指

戊申秋禱于城隍有卯年生子之識

果到卯年識

始真吾年亦且六十矣他人六十見孫曾吾今望子尚姑
俟人家生男本尋常胡至我躬難如此至苦莫如田家翁
父出扶犁群兒偕叶苟起切至窮莫如丐乞兒夫負妻挈走纍
纍至賤莫如洗削及馬醫家家有男供驅使至惡莫如子
母徵責家白晳兒郎盈皆肥魚有鯢鱗雀有殼石榴有子
麻有臬世間物物皆孳生君看蜂子亦成壘我獨何辜降
災割年過商瞿迫濛汜笑謂許子君不知此中遲早多寡
有妙理君看蜂來豈無因茲兆分明非誕詭吾聞蜂一名
爲萬以一生萬且靡止萬盈數也無終窮大萬無不自一
起君今望子如景卿後且多不可勝紀一年一子子又孫

孫枝蕃衍群戲綵

叶此禮切

鳴笳導從披簿籍汾陽但領之而

已君不見畢萬之後世必大公侯子孫復其始吾聞蜂王

之子代為王猶士之子恒為士舉手賀君必多男雲仍相

承守圖史釀成花筆如蜜房好作鹽梅調鼎手

叶書蟻切

似續

柏臺舊家聲詎止為國克耘耔君不見蜂窠一日兩排衙

將相君臣皆有禮出入扈從為前驅體統非同凡虫豸日

出于卯象開門卯日單闕物始茂

叶姥罪切

鄭玄祖孫同卯生

未若父子相同世濟美吾欲排雲叫天門綠章一紙奏帝

叶爽揣切

紫府香案遣金童化為玉燕投懷裏待到卯年降

君家恰與阿翁序同齒兒年六十翁百二翁年百歲兒強

仕裴庾那有雌甲辰程龐都是大戊子君家舊有丁卯橋

從茲錫名高陽當日乙卯里非熊詩句悟前身羊祜金鑲

發後祉其時我來掀髯捋君鬚始知蜂來蜂來良有以又

年乙卯果生子

射蛟臺歌壽吳壁如六十

射蛟臺上聚群英君家兄弟最矜轟論文不數當場鬪結

客能令滿座驚千金解贈尋常事肝胆輪困才縱橫亂餘

家計已垂橐李囊雖富阮囊薄癸亭杯酒儘勸酬丙舍書

聲未蕭索方干

子諡兄弟

凋謝鄧禹

東之

亡幾人風雨還如昨

回思白下走歡場青驄油壁胭脂香聲動瑤笙開繡幙影

搖銀燭照紅粧吳姬錦瑟曾同醉楚客荷衣祇自傷于今
縛屋連桑柘老去生涯託穉穉客至休論上下床雞肥好
約東西社但愁北海空復空莫問雲英嫁未嫁阿弟舟之
多年賦玉樓羨君六十已平頭大男腰鎌能負米小男鼓
篋知校讐墨蹟牙籤閒簡點漁莊蟹舍任遨遊勸君坐臥
圖書裏朝出扶犁暮課子隱囊紗帽似神仙版屋茅簷真
處士我不得耕下潁田君無輕入襄陽市

長孫義炳初就外傳詩以勉之

我年五六便入學辛苦一生守硯削書淫傳癖到今癡把
卷瞪曹猶如昨汝父六齡亦受書琅琅雜誦臨通衢尚憶
汝昔初生日驥子熊兒墮地殊竹馬風鳶曾幾許眼見受
書又到汝愛孫祇合含果飴代父安能斷夏楚喜汝拂几
纔啓唇負劍却立知吟呻讀書有求非富貴奇字要識是
君親汝生半歲父不祿搥牀只爲孤兒哭今朝若見汝塗
鴉梨栗詩書欣有屬老我師丹性善忘齒牙落盡鬚眉蒼
惟憑書卷課孫子耕耨肯教筆硯荒他年學成能撰著須
記今日射游處願汝勤苦勝家公莫待老來秉燭嗟遲暮

廩山歌祝方姑母六十

廩山愚公人天師文章風節海內推人知通德一門世濟
美誰識閨中賢婦之母儀家法穆韓原不忝壺範鍾郝猶

可追師之夫人吾姑母

叶

鄉里城南天尺五少小行步施

琚璜長成束髮依保姆抗跡圖史無陝輪教本重規復疊

矩鹿車鴻案及芳晨上堂執匠陳棗榛白鹿湖邊垂白老

王姑趙
恭人

清芬閣裏懷清人

老姑姚
夫人

羊機果遂黻佩願盛年

師充觀國賓一朝鐵騎散函起群賊蠡屯長安市百官垂
首三木囊提刀斫背如斫豕脫身虎穴萬死餘芒鞵不得
見天子母也佩劍衝刀鋸攜家彳亍荆棘場纔報妻兒還

故國早聞名姓挂刊章王稽誰肯開車載賓石還將複壁

藏

謂陽
江也

江南片土几上肉秦庭有淚誰能哭萬里重趼竄

嶺南母亦間關窮水陸蠻煙瘴雨飽經過袈裟一領還初

服此日尊章顛霜毫

貞述
先生

此時昏嫁未周遭花下籃輿廢

華黍燈前荻畫焚蘭膏向非母也持門戶禪鎧安得常堅

牢忽漫聞師記荊去一日九迴廩山路痛哭西臺髮欲晞

長埋井底心猶錮脫簪甫庀所天喪負土更營阿母墓祇

今六袞坐高堂久已憔悴如媪孀師雖順世一二載母已

孤幃三十霜麻衣皚皚白如雪鞠裳禴翟疊空箱回首昨

年蜚語急長筵燕喜有今日蘭蓀繞砌進壺觴母但低眉

淚暗泣日餐脫粟飯一盂梵誦香燈吾事畢小子髻鬣初

屬文曾侍母側繙香芸

少與母
同師

天分自慚同謝遏書法焉

能亞子雲何幸昆明劫灰後歡喜贊歎四衆聞而今悟却

法華轉眼見蓬池幾清淺湛寂光中發慧觀應為合十連
稱善願現如來壽者身報母平生眉未展

輓唐偕聖

嘗讀古人獨行傳孝友信義難兼擅良繇沾名意較多嶽

寄歷落儒行賤網羅鄉里數百年表揚略盡先朝彥昔年曾修

邑何幸吾世逢哲人生幸同時罕一面高生旦今為我述

遺芳髣髴古人今重見孝則躍鯉非荒唐覓魚祀母時河圻如龜腹公泣

澤畔以王祥事默禱友則挂兒無畱戀避賊時聞弟凶問遂棄兒于地襁孤

去明日外祖母獲信如馮謹券可焚焚券郵寡義似程嬰死不

變肩刃令子楚山衰經登吾堂雙手捧狀淚如霰至性孝

友有本原是父是子人皆羨安得綽楔榜里門挽澆還樸

閩左徧盡使人間梟獍流回心嚮道思為善惜也闡揚潛

德予非倫待君著作承明殿

童烈婦行童玄籲之繼配孫夫人孫石文之小妹也偶讀祝山如望海水篇感而有作

憶在乙酉改元初職方童公首上書尅日類禡出神武兼

領諸軍銅虎符童公諱天閱時監軍中流擊楫誰同濟孫

卽小妹偏明慧箴管靈芸繡紵工軍容譙國麾幢麗曾作

香奩金粉詞催向妝樓早画眉今宵洗盞猶呼酒明日舉

旗便出師誰料中原徧銅馬尺木竟難支大厦乞援曾無

矢一遺過河空有淚盈把嘆息神州日月昏祇憑寶劍報

君恩力盡疆場惟裹革身騎箕尾孰招魂閨中血淚浸羅
綺一片冰心照海水寧甘憔悴守空幃不更二庭隳廉耻
脫却榆翟禮空王顧影熒熒心暗傷秦珠割作精藍飾霧
縠施爲繡佛場何人錯夢陽臺雨截鼻呼天觀如堵引刀
斷臂王凝妻入帷別日盧家女可憐繞膝雙女雛大者啞
啞小呱呱教成錦字冰和墨裂破麻衣血染襦歸來已是
遼東雀但願門楣皆有託寡鵠孤鸞豈耐秋布衣椎髻還
如昨我因婦烈懷臣忠捐軀慷慨仍從容若不毀顏報魏
溥誰知碧血是萇弘樸巢居士吾詩友望海一篇堪不朽
寒窻燈炮吟復吟如此方不愧爲忠臣婦

第三孫生

老翁望孫勝望子只求蘭玉滿庭肥年來勅斷家事完晨

夕與孫同卧起阿望

長孫義炳小字

馴謹有父風阿誕

次孫義韶

慧更俶詭含飴且但分棗梨畱硯原不覬金紫秋風送涼
到書堂阿望入學齒未毀祇餘阿誕繞膝前時時挽鬚博
翁喜今朝縣令過我門又驚啼聲清入耳衰年最愛惟添
丁荒畝何暇計克耔三日錦綉告家廟字以阿令從其始
所幸後來室中人愛渠與我愛相似乳湮從他拂袖懷果
茹弗惜頻儲侍使渠祖母今尚存愛孫亦不過如此幼兒
甫自薊門還試向蘭房探群婢倘徼天幸連生男不待六

十五孫矣

時子年五十七

龍眠二李篇爲芥須先生壽

去年仲冬十一月石逋先生稱七十今年王正月下澣又引芥須長筵滿二李先生國之琛兄弟價重雙南金豈惟詩画追三李更許風規敵二林石逋抱道老田野先生足跡半天下巨靈一掌障狂瀾別裁僞體領風雅記得塵沙火劫年天南赤手捧虞淵孔璋曾草勤王檄越石還封勸進箋墨盾濃磨騰露布拜官不肯營當路講堂且對戰場開馬帳時從鷁首聚先生宦遊司鐸時事還家寒食路淒迷江頭風雨泣棠梨雄文空有童烏痛鴻案兼二椎髻妻猶喜故鄉才望盛逢迎到處知名姓缺有車魚馮舍人齋分經事胡安定卽今歸來東臯莊青鞋布襪足徜徉亦有蚍蜉撼大樹適成鳩鷺捨榆枋先生曰嘻夫何害禱嵩詛岱憑流輩談諧自是滑稽雄詼謔未免狂奴態昨來訪君到巖阿樹睂榜門感慨多焚香不惜頻縈篆把酒何辭劇卷波嘆息風塵如轉轂方鄧還青顛厓舊交皆宰木爲壽儘多諛墓金生兒還要煖燕玉暇時過我草堂中隔隣喚取石逋翁一觴一咏都堪老夢懽夢愕何終窮

賣鑿行爲方子安母夫人賦

昔人善買鑿今人善賣鑿買鑿鄭人昔何愚賣鑿方母今

何智借問方母出何家延陵女宗婦德備尊章種花無諸

城

君周先生
辛建寧

歸來松菊靡一遺祇存破屋老梅中洗手作

羹躬執饋有子少負不凡才負笈函丈受誣諉歲殘不給
束修羊仰屋長吁潛涕淚顧我桁上無懸衣按盡傳璣少
珠翠尚存老鑿皮牀頭賣來且了先生事吁噫嘻古來賢
母教子成類能糠慨明大義麴母揮金買異書薛母授經
飽腹筭誰能割取嫁時裝持向書堂作師贄方子乞言走
通都愀然念母劬勞意他時何以報母恩好將彤管爲母
記上之當宁備采風千年石室藏金匱

家徒四壁歌爲江都宗定九賦

宗子維揚一俊人螯弧詞玷二十春年少結交皆折輩才
高著書已等身家世城南尺五住商歌金石鏗韶濩長風
詎無破浪時名山尚有臥遊處獨怪家無擔石儲紛紛俗
子爭擲榆杜門不灑窮途淚拂几惟繙充棟書書籤書笈
照丹碧南面百城樓百尺未至蓋頭無一茅且喜滿眼存
四壁四壁荒涼風颼颼席門懸薄秋復秋不少題門逢愈
湜時聞掃徑來羊求如君四壁真堪羨讀書肯讀相如傳
綠綺猶嫌聲價輕黃金未免文章賤君不見格天閣偃月
堂奉誠園履道坊碧瓦朱甍成荆棘賢愚忠佞同銷亡卽
今隋苑憑誰主白衣蒼狗何堪數竹西歌吹已荒烟平山

花竹亦塵土何似先生愛吾廬一幅衡門老屋圖凝塵蔽
席琴書古香篆縈簾歲月紆揚州富人日不足前榮後寢
堆金玉獨抱冰雪一卷文睡覺芙蓉香滿屋

先生有芙蓉集久爲寓內

傳誦

木厓集卷之十一終

木厓集卷之十二

五言律一

秋雨懷子厚弟村中

胡不日而覓村居雨更淒泉聲穿霧出樹色與雲齊荒屋
蛭蛇走深山鳥鼠啼避人須此地遲我問前溪

夜雨復懷

爾過洪濤去應留北峽關荒烟秋草上積雪夜蛩間醉卧
知何定歌吟羨我閒古來高隱者不必入深山

上鄭中丞

天柱銘勳日欖槍夜不飛但聞籌筆苦未見謗書稀六月

常傳捷三年便解歸近來江北事處處哭重圍

白門立春日李叔濟過飲

時序他鄉改愁顏渾欲新菜盤聊共汝綵勝亦隨人雲物
占偏好葭灰動果真江南與江北未必便同春

歲暮東從叔薪孫

歲暮人情密他鄉頗不然殘年聊一度旅舍况三遷酒憶
桐城好魚懷縱水鮮仲容差免俗但負買書錢

乾坤亦已大俯仰愧平生久絕春秋筆誰爲月旦評彼人
方逐客吾意亦逃名努力東風早荒田正可畊

生兒如我輩空負百年身嘗藥吾將母瞻雲爾念親江魚
緣不偶胡馬信偏真春酒年年熟登堂各愴神

日月形吾短寒暄客倍驚山城猶盜賊帝里正花鶯叔
姪年俱壯功名事未成竹林徒縱飲吾欲問長纓

喜從祖次益至京兼得大王母消息

江南搶攘日塵起蔽旌旗本不分三窟何妨共一枝高
皇多戰伐首定此城池亂後驚相見移家更莫遲

白雲殊不定望望太夫人耳豈聞風鶴身如卧火薪綵衣
空憶舊羊酪罷嘗新所喜精神健能憐兒子貧

懷張圯孺歸里

匹馬孤城暮淒風雜鼓鞞步兵思鱸日京兆畫眉時世亂

能借隱家貧可佐炊少遊真不忝休作四愁詩

病中渴甚喜暄文攜鏡餅過問

忽忽成何事春殘却夏初既貧還善病不拙亦閒居伏枕呻吟苦應門灑掃疎故人青柿好特爲憫相如

寄懷張圯孺妹丈

此地傳風鶴真令淚眼枯棄城猶宿將括餉豈貧儒漫捲詩書去終愁庚癸呼亂離殊不易珍重鳳將雛

寄懷吳左賦妹丈

念爾居城市嘗憂兵不和狼烽傳賊火鱸膾悞人多風雨寒楊柳干戈狎薜蘿會尋林慮去泣作五噫歌

午日

佳節隨風土南京似故園午餘花棄市晨起艾當門俗或非湘水人猶憶屈原滿江多白骨何處可招魂

去年逢此日拜舞觀西京風物何曾改人心已數驚畏兵兼畏寇懷妹卽懷甥家國經時恨停杯淚眼橫

留別南京諸子

廡下三年客良朋日夕俱歸期逢稻蟹樂事比蓴鱸林慮山將隱河梁馬未驅北風雖好我空復詠狐烏

蕪陰喜遇暄文

牛渚新秋月知君望我求

暄文艤舟數日

本無雞黍約似爲榜人

催關禁分門出官儀夾道開平生懷郭李歸去卽蓬萊
晚宿山莊因念老僕陳敬思

唯爾黃泉下知予近苦饑入門徒有淚掃墓已無兒樹老
山誰主田荒水不支十年前過此雞犬亦堪思

爲雷右賓催粧

秋月仍圓夜文簫嫁綵鸞繫繩新締好結帨舊承懽荳蔻
香生豔靡蕪氣辟寒朝來膏盥罷雙向鏡臺看

犢鼻歸司馬荆釵拜伯鸞斂錢予負愧種玉爾追懽翠幌
生懷夢霓裳憶廣寒阿嬌金屋裏爭得外人看

日高初奠鴈露下始乘鸞貞木秋連理名花夜合懽耳嫌
更漏急手怯被池寒縱有眉添黛依稀帳裏看

高節曾招鳳孤絃且續鸞但須呼爾汝不必詠儂懽黻佩
終難隱釵裙可耐寒何如林慮好同挽鹿車看

贈張甥

信有陽元器亭亭玉樹花畫書如識字索食解呼爺小陸
長宜笑中郎本善誇腐儒無可似慚愧倚蒹葭

聞方子留削髮爲僧喜且志感

客從西浙至纔憫故人思爾已離樊鳥予寧入廟犧籃舉
猶漉酒白社或攢眉安得龍眠裏相將拔旅葵

臧壽平舉孝廉

早達非吾望搏飛亦偶然幾人猶下第此日獨先鞭劍鬱
凌雲氣書深映雪天故鄉殊念爾爲發孝廉船

喜暄文歸里酣談竟夕

握手情何限銜盃酒亦勤話深防屬耳喜極恐離羣麥隴
予懸耒瓊林爾鬻文荒鷄雖不已分作兩般聞

觀燈

山縣雖荒寂春燈頗不貧先期分月色未晚遇遊人翠幙
搖流影香車起暗塵十年前似此渠是太平民
金陵佳麗地燈市有燈樓改里三年別新春一夜遊市喧
還插柳樓小亦拖鈎此際重回首邊笳起暮愁

紀夢

自我歸投子遥遥會面難書從江上斷淚向夢中彈怨極
初無語情深但一看香魂如未遠惆悵曉風寒

清明出郭遊五印禪寺

負郭無香刹經旬懶出城信因天好雨况乃縣徵兵佳節
多遺恨春風知我情禪林荆棘裏記得老僧名

白門送方子詒汪惟肖歸里

昔爲君僦舍我已倦遊人復羨歸期早重令客思頻孤帆
隨鴈遠一榻與蛩親感此窮途泣無顏更劇秦

送陳季白歸里

琴劍連三月君歸我未歸送人何必淚作客獨無衣潮落
江流急霜深鴈字稀會須尋谷口同詠北山薇

放日詩

跋涉來京國真成汗漫遊本無投閣意祇爲倚門愁捧檄
寧無日焚書愧有秋放歸聊謝母舌在復何憂

劉蕢雖下第同學半垂紳空有彈冠喜長爲伴嫁人下車
徒愧我贈佩益傷神恨極還長嘯輸贏恐未真

客懷

芙蓉故綽約未免怨東風水涸舟難進衣寒篋已空隔河
鄰婦哭踏雪塞鴻窮遊子忘歸久淒淒旅况同

人日

南國朝多霧東風夜起塵天寧猶有日吾亦愧稱人剪綵
將何意烹蔬益愴神祇應語朋好珍重百年身

夢中得澗草隨春發林禽向曉鳴之句醒于枕上續
成之

細推消長數未有不陽生澗草隨春發林禽向曉鳴物情
皆有托吾意欲何營此夢非蕉鹿披衣天已明

雪

敝廬荆棘底兀坐晝無譁對此千枝雪居然二月花怯寒
如有病消渴不須茶拙婦知予意呼童問酒家

得方子留書

不見方生久新詩近若何大都離黍嘆不是飯牛歌恨觸
風雲起窮嫌妻子多開緘看小篆自署曰頭陀
見此書中淚知君顛顛顏遙憐一破衲非復舊斑斕靈雨
無朝氣寒雲積遠山幽蘭何自苦終不到人間

雨夜東季白讀書啓聖祠

之子姘修密春深擁絳帷雨中人事少燈下論文微漏盡
螢將倦書勞蠹亦饑先賢靈爽在應有夢乘緋

三月三日

天不憐佳節花容爲雨愁河流方漲漫被襖祇羣鷗抱膝
無詩興衝泥過酒樓古人尊痛飲醉卽喚三騶

松山道中

積雨銷春色鶯聲暗柳堤山從玄霧出路入白雲迷快馬
鋤芳草殘花葬濁泥吾生何碌碌爲覓一枝棲

哭亡兒仁桃

子長兒仁桃生甫三歲竟天天年悲慟之餘形諸咏
嘆昔人謂情之所鍾正在我輩予于仁桃亦云

汝本河陽種無慚上苑枝花

心獨茂蒿里忽同悲昨夜

猶呼我今宵欲抱誰喪明雖不可其奈好男兒

爾之曾祖母垂老七旬中哭子哭孫久憐生憐死同何心

更痛汝有淚莫臨風安得娛衰景常從夢裏逢

舉家皆惻目王母倍傷神淚爲諸孫盡心同阿母真本期
汝笑語差代我昏晨寂寞含飴意階前少一人

得汝三年內何曾一汝憐祇今酬藥直尚負買棺錢汝父
窮何罪他人富有緣死生辛苦盡相見是黃泉

汝母知珍惜三年未去懷今秋纔有弟牽汝過庭階失乳
情難割分梨意已諧不堪泣成血天地亦陰霾

同胞無伴侶汝姊畧追尋對月學深拜聞詩解細吟只言
全勝女豈料卽亡琴哭弟何爲者令予益愴心

往歲連生子皆因痘疫亡彼蒼何厄我此子復罹殃土瘞
三珠樹霜摧九折腸傷心今倍昔聰慧最難忘

汝弟雖孱弱焉能代汝僵天桃旣自折苦李必無傷縱許
一枝秀何如雙璧良親朋爭慰唁轉覺助淒涼

昔爲汝擇婦早結外家緣宅應陽元吉牀知逸少賢絲蘿
欣有託薤露慘誰憐遙憶水清者聞音必黯然

翁也

內弟方子
留吾兒婦

汝見諸親舊登堂一揖偏啼聲何必試繞膝自堪憐珠憶
初輝日苗悲不秀年巷人亦三嘆愁絕淚如泉

汝雖無乳媪老婢一相依每日抱兒去鄰家得果歸入門
遺母急出袖自存微愁見渠來往懷中人已非

憶昨艱危際呼余未上牀至今欠一抱空有淚千行

兒臨逝屢

呼余抱不知其爲末訣也傷哉

事事留追憶時時觸感傷九原如可作除

是返魂香

連宵必十起獨卧轉蕭森陋室風難蔽薄衾寒更侵忽聞

窻嘶嚦猶似汝呻吟憔悴容顏改嬌姿何處尋

雙眉清似黛兩頰豔如脂骨相那當天干支亦頗宜皆云

勝汝父準擬是吾兒始訝彭殤理人人皆可疑

雖與羣兒伍風規故獨殊頗能辭棗栗不但識之無被裂

隨爺卧衣新向客呼世人嫌早慧此語未全迂

一城童子厄聞病卽潜然栢柳醫皆善

時栢柳二醫皆國手也

參苓

藥更全早知生有數何必苦相纏鄰舍無醫藥兒瘍亦自

痊

平生嬉戲具一見一含悽剖竹能爲馬鐫碑學用鷄旌旗

薪與木俎豆瓦和泥悔不同犀塵殉兒祖墓西

頻年常作客歸必汝歡迎偶爾出門去猶防予遠行奈何

棲獨舍相問祇諸甥莫不亦行役髫年卽請纓

魂去將何適泉臺路渺茫若生他氏族莫再悞爺娘有壽

寧爲女雖男不可殤探鑲須念我留得紫羅囊

故人來慰藉予亦強相捐對酒誰偷飲觀書孰喻玄尋常

排悶事反覆與愁緣靜悟鍾情理斯言非偶然

哭亡兒仁桃詩二十首竟復賦一章

死去已無及重來或可期昔賢有顧叟七十喪熊兒賴此
五言力仍將一子遺靈根如不泯應誦汝爺詩

庭階

庭階新雨後徒倚獨躊躇最愛垂楊活全忘草不除逢人
問盜賊聽女讀詩書忽忽三春半臨風恨有餘

歸過樅水

擊汰還樅水離家一月人邸居剛十日江路却經旬朋舊
分岑寂風霜盡苦辛老親與稚子應許鵲傳真

畏說樅陽近勞勞憶所私避人非得已遠涉亦何爲密約
蛩能證孤懷鴈未知早春仍過此遲爾擷江蘼

自昔

自昔頻遭別三年戒作詩早知窮有命悔與爾長辭矮屋
朝暎暖空堦夜月遲一冬渾底事吾欲嘯東籬

寄東從叔薪孫

作客長干久勞君愛不才束裝看榜發含淚聽舟開自分
駑常蹶那知蘭亦摧一門無好事五十二年來

遙憐諸弟妹猶博笑顏開釀秫應成酒臨池况有杯秦淮
橋上雪靈谷寺中梅遣興知無限嗟予困草萊

雨中喜方爾止見過卽留同方爾從井公左子兼夏

子小酌

淫雨凭牀卧高軒倒屣迎遂忘簷雷滴惟有誦詩聲樂府
蒐昭代元音敵兩京其餘誰更好十律最傷情
夜闌談往事擊劍有同哀入室蛾遭妬當門蘭亦摧如君
原足忌愧我實無才感此韋弦訓沈冥托酒杯
匡阜饒奇秀登臨夙所期因君有詩話使我益懷思薄俗
爭何益浮名說亦癡山靈應不妬攜手問東籬

買花

千里吳江種移來經幾旬舟中應束縛雨後覺精神叢桂
憐何小山茶恐未真那能免俗好點綴草堂春

洗竹

春林涵淑氣翠竹亦敷榮細篠除從盡新枝看漸生臨風
逾綽約著雨更蔥菁似惜幽芳冷紅梅間綠英

竹中偶
植紅梅

人日聞暄文已至亳州

歲暮還家急軒車猶暫停亳州寒近北別駕禮分庭人日
歸思發天風落照暝草堂多臘酒待爾酌春星

送何武伯之歸德兼寄其令叔待卿司理

北地寒猶烈驚心送遠遊風沙遮去馬霜雪壓征裘爲有
向平累聊從阮籍謀日歸須及早不獨倚門愁
司李擅民譽仁風惠有餘故人俱不忘猶子更何如分俸

應難却開緘倘念予菟園詞賦好莫惜寄瓊琚

同綏人弼士出郭偶遇如三因偕過石經小飲限燈
字

出郭偶尋僧歸來遇友朋因攜過小築相與伴寒燈酒以
多從醉魚雖賤莫憎不嫌兼味少剝啄任頻仍

夜靜談猶劇呼童更剔燈素心交自久薄俗吠何憑祇恐
舟中敵空爲鞫上鷹因懷徐悱歿泣罷淚成冰

時妹夫張
圯孺新逝

喜吳爾默移家入城詩以贈之

每惜鄉居遠經旬始一歸何如入城市常得侍庭闈舊業
槐初種新詩萼更輝此間差簡僻只似掩村扉

歲歲觀秋穫山莊近朝川奈何頻有約相訪輒無緣書卷
隨人至鶯花爲客遷從茲謀婦便莫惜解囊錢

送女歸陳氏

行矣爲人婦言之鼻已酸自從生汝後何日不承歡母拙
教兒少男遲待女寬德門多禮法難作我家看

陳郎真玉潤他日必名儒每食須相敬何衣不可娛汝能
常婉嫕親亦少憂虞莫嘆離家遠比鄰有小姑

居與方
氏妹鄰

十七閨中秀登車頓遠離可憐一幼弟送姊尚兒嬉儉歲
香奩薄貧家竹筍宜况無犬可賣此際爾應知

一從懸帨日長說有茲行何事今朝淚如從意外生含悲

成醮禮執手待車聲慎守無違訓拳拳王母情
大龍山宿謝玉樹宅有贈
萬山巉絕處茅屋兩三椽避亂依先隴謀生墾薄田尚饒
杉竹利兼得子孫賢不盡桃源思相看一憮然
君是謝庭樹如何老此山爲憐千嶺秀贏得半生閒階草
憑驢食園花任僕攀夜深猶進酒共聽水潺湲

山莊寒夜憶母氏卧病

颯颯松聲閣今宵風更多不知違別後卧起復如何藥要
加參朮衾應撤綺羅永懷難假寐霜葉落庭柯

孤生兄弟鮮誰復侍庭帷小妹還家急嬌兒散塾遲乍寒
乘夜入久病怯風吹辛苦惟羣婢添衣恐未知

一月憂如醉昨來始百端竟無王母健愈使寸心酸半世
和丸苦吾生捧檄難夜深應嘆息更念客中寒

九日

卧病當茲日其如逸興何擁書聊假寐對酒欲高歌籬菊
開猶未山查熟已多且同農叟話待月上藤蘿

出戶東西望浮山與柳峯爲尋村父約空惜暮雲封黃暈
螯初滿紅稀稻半春回思僑寓日貰酒與何濃

去年此日
同友人飲

長干
酒樓

練潭與從叔薪孫宿蘭若

廿年同被久回首各霑巾山郭園居並秦淮客舍鄰何期
風雨夜重許夢魂親記此連牀處荒菴浴佛辰
離城無百里底事便南征金盡還家急風高挂席輕燒茶
深客話添火見僧情六月歸來否江頭一笑迎

懷范小范

暑退新秋日潮生微雨初遙憐垂釣客羨殺滿湖魚親老
能加飯兒賢自讀書支公錢乞得何不買山居

傳爾離鄉國輕舟下石頭陵木稀于鹿江楓冷入秋因人
非得已采藥共誰遊陳顧猶遺叟相逢足唱酬

謂陳伯璣
顧與治也

出門次母氏病中送別韻

繞膝難爲別寒風欲雪天浪遊緣底事不病亦悽然藥食
須常進憂懷勿遠牽日歸雖未卜端在立春前

舒城道中

時過濮曉陽
先生講堂

迢遞舒城路征軺鎮日忙出關山漸少近郭地猶荒沽酒
依村店懷賢弔講堂土人稱邑令新政似龔黃

潁州道中

星霜三十里始見日高春野曠人烟迥天高鴈字重居民
惟刈草沿堡盡懸鐘漸喜停驂近城頭樹影濃

太和道中

獨有桑麻樂因知風土良
砧花染色麥隴樹成行城小

更新易民淳報祀忙龍門應咫尺空過鄭公鄉
送倪南蔭之鄴下

客中難送客送爾更關情有弟堪爲伴無驢可並行漳河
冰未凍林慮雪初晴莫以登臨久春風悞耦耕

將雪同萬嶮南明府一無上人限寒字

爲訪名園雪寧辭客舍寒久晴知不免今日應同看梅萼
含香闕鴉羣啄葉殘同雲爾何意莫作雨漫漫

憶倪南蔭漳河道中仍用寒字

不是曾聯轡何由念汝寒手皴鞭少力鬚結凍成團河北
風無限梁園雪有端干人非得已都覺媿袁安

謁二忠祠

祀唐張巡許遠

寂寞西偏地高祠晝掩扉乾坤猶戰伐魂魄此憑依落日
荒荒薄歸鴉漠漠微無繇覩遺像遙拜一歔歔

徐恭士招同賈靜子侯輔之令姪來玉過集

淄淄陰雲合淒淒古木殘幽人方閉戶招我共凭欄詞賦
洵無敵

恭士出新刻見示

圖書足互觀高談欣滿座飛竿不知寒

酒半重搔首巡簷悵落暉凍含藤架密土壓藥苗肥問俗
嗟何異懷人願輒違

時座中懷方爾止

醉歸那用燭霜月照寒衣

目病

長夜不成寐其如目病何將無寒中久還是酒傷多拜佛

燈難近看書字易訛祇應穩趺坐閉眼學頭陀

送何貞子還里

君且還桐國予猶去黍丘思家遊子夢送客異鄉愁母病
催頭白兒書帶淚修數行憑寄附千里莫沈浮

半青禪房雜詩

倦遊生計拙繞樹一枝輕梵院斜開徑僧樓近接城攢眉

聞酒戒叉手得詩情且喜逢休已藏書足細評

一無上人
能詩所藏

古今名人
詩甚多

抱被僵寒卧連宵未穩眠如何孤客夢祇在北堂前病減
應辭藥寒深更著綿褐衣新買得無計托鴻旋

日暮間無事寒風繞座隅看詩親佛火烹肉怯僧厨野燒
驅殘霧城鐘起宿烏賴多詞賦客來往慰窮途

牛車朝復暮官道去如梭屢次出門去其如塵土何黍薪
珍似桂麥酒薄如醯聊復同僧坐清言託茗柯

登樓空悵望王粲欲何依主拙僮眠穩僧貧客到稀焚香
鐘後靜煨蕒雪中肥趁此偷閒地無營學息機

飲關肅公嚴公宅賦贈

二仲談經處深居靜掩關書聲爭唱和花萼自翩翩蠟展
聊相訪雄文許共論秋風叢桂發鴻鵠好雙鶩

孤生悲杖杜家慶爾團團不獨弟兄樂兼承父祖歡

堂上
重慶

世交何繾綣先澤久凋殘夙夜如無忝相期共采蘭

稚子

稚子初生日羈留皖水邊常言今歲樂抱汝入新年作客
嗟何定思家夢屢牽不知啼笑處幾許動人憐

夢與綏人如三古愚敦復論詩義古愚尤箕踞縱談
詩以紀之

客夢輕千里遙登心遠樓城頭芳草綠檻外暮雲浮把酒
逢三益論文失九州就中誰最壯齊瀚足風流

留別黍丘諸子

客中驚歲換帶雨戒行裝此日卽歸去焉能到故鄉出門
愁便減別路恨應長回首春城暮烟波正淼茫

次韻酬一無上人贈別之作兼別源清禪師

漫道梁園好崎嶇行路難可知游子况了不異僧寒惜別
愁明發吟詩到夜闌郵筒如續寄對月許同看

送方爾從之彭城移其子公敏觀歸里

年年常送別此別最淒其哭子誰無淚佳兒應更悲羣雛
風力長寸草淚痕滋驛路看春處知君重所思

歲暮多陰雨輕裝遽遠征祇因舐犢愛一慰首丘情老母
倚閭待孤孫執紼迎故人有高義應惜麥舟輕

夜雨懷張袞望寓齋

山郭春垂盡那堪風雨多遙知孤客夜獨坐惜蹉跎枕被
寒應久池塘夢若何明朝如復雨蠟屐爲君過
署于皖
衣望將省其兄太守

梅雨懷方井公客閩中

梅雨連朝濕門無二仲過竹叢陰霧密石罅暮雲多掩卷
忽長嘆懷人發浩歌不知閩嶠客遊興近如何

計到榕城日爲時已麥秋荔枝紅壓樹蜜蠟碧迎眸驄馬
應聯轡牙檣好共舟歸來出佳句一讀解離憂

懷齊念修授經六安

之子傳經處臯城落照中八公堪著屐二仲足郵筒
謂徐明鹿

莘叟也

性拙時名淡才高物望同雨前茶味好揮塵一何雄

齊家楓樹下雨過稻花香料得嘗新穀多應返故鄉倚閭
悲鶴髮歸路想羊腸莫爲關河阻看雲日渺茫

聞說出門後妻兒生計窮典衣箱欲盡索食益時空有弟
饑驅去
時令弟秩斯亦客淝水
辭親旅食同故人多遠適更惜爾飄蓬

和陽逆旅讀戴敬夫先生詩有懷

寂寞河邨老常從此地過永惟湯沐邑高咏感懷多豈意
當今日令予發浩歌臨風一披誦目斷舊山河

濡須道中

木里集十三
衰草連江北濡須路更長驅驢憑短策沽酒怯空囊古壩
秋潮健邨春晚穡香呼童詢渡口衰柳挂斜陽

安慶道中

江邨風雪夜茅店欲飄搖無分容高卧驅驢向短橋嶺雲
陰易結沙路凍難消底事宜城道頻來不憚遙

積雨病中作

泥深難出戶不卧亦安之轉覺連朝病偏于積雨宜雨晴
如有意病愈却何時惆悵歸鴉晚呼童數問醫

將霽雲猶黑方昏月忽妍病緣應未了雨意故相憐鼠鬪
書倉裏蛩吟草榻前那堪簷溜急滴向五更天

予方擁幙被客亦罕敲彈信是天多雨愈令病者安剪蔬
秋霽後煮藥午炊殘老婢裝綿慣爲防薄暮寒

晴雨相持久風雲興亦闌生憎明月出頻向畫欄看秋意
辭人急燈花落紙寒平時一尊酒到此入唇難

木里集卷之十二終

木王集卷之十三

五言律二

巳亥元日

荏苒閒居日蹉跎強仕年靜思今歲事吾意亦茫然父宅
須勤卜奚囊合早編雕蟲雖可棄何以慰黃泉

是日誓為先君卜地

歸窆竝編輯拙作成集

半載風塵裏纔叨此日閒典田償國稅訓子慰慈顏椒酒
香堪把梅枝近可攀獨憂王母病白髮淚潛潛

晴窗為母氏寫華嚴經

不知堦砌草何故綠纖纖獨子防親病殘年仗佛添焚香

陳筆硯鏤碧寫華嚴且喜逢晴日遲遲上竹簾

懷陳子垣

空遣蒼頭去羈遲臘又春風塵秦地盡戎馬蜀山隣莊鳥
應多病原思况苦貧故人雖傲吏交誼本雷陳

盆蘭

梅謝全無薤蘭香尚有叢得來深谷底移植小盆中
傷砌霑晨露推窗受晚風平生幽靜意最羨爾能同

送齊念修授經臯城

斯世交遊薄依人計總非算來惟馬帳差覺勝牛衣賣賦
名凡滿傳經願不違思家心若動猶可計程歸

同齊古愚張如三飲許綏人宅

衝泥渾不厭最喜到君家剪韭租三畝藏書敵五車高談
杯竿駛久坐僕僮譁出戶瞻星漢城西月影斜

送齊然四授經濡須

又復傳經去濡須客夢賒分明舊時路此日倍堪嗟雜佩
封遺篋嬌兒託外家出門應有淚愁殺竝棲鴉

過吳左賦心遠亭看雪

捲簾看積雪如泛剡溪舟梵宇瓊爲樹人家玉作樓沙田
低麥秀石礪咽河流誰信山城裏蒼然野望秋

送方爾從之維揚限東字

怪爾年年出何曾一送窮此行逢舊雨應爲惜飄蓬酒力
愁邊長詩名客裏工邢溝繁麗地絕勝灤西東
見說維揚勝雲山杳靄中潮迎瓜步雨烟送柳隄風場鹵
連江白桅燈夾岸紅餘生方草土自分老牆東

喜子垣歸自漢中

柴門深巷裏剝啄爲君開棧向秦山別舟從漢水來錦囊
應徧歷霜鬢未全催好趁新芻熟離情托酒杯

將赴秦中吳賡菴臬使之幕有感

亦識爲儒賤其如世業何講堂恩禮薄幕府俸錢多吏事
須言練民艱合揣摩西京饒勝蹟應得飽經過

老見頭已白此去輟承懽欲語先垂淚別時應更難何曾
爲負米并不是彈冠迢遞三千里秋風客路寒

准擬中秋後攀花奉板輿壽觴羅棗栗賓從滿庭除待奏
南飛曲還驅下澤車看雲知漸遠回首意何如

秋來何限事亦欲葺廬居又輟將移竹兼殘半著書輕裝
拚獨往幽徑與誰鋤記室知無補蕭蕭髮影疎

哭從叔新孫

衰宗胡不幸吾叔復長辭得疾亦何遽凶聞久始知竹林
空酌酒山墅罷圍棋痛哭西風暮荒庭落葉悲

司馬諸孫在惟君最長年一從桐邑亂半客秣陵邊警句

追詩史狂書敵草賢哭君兼哭祖庭樹益蕭然

幾欲奔喪去徒令淚眼枯家鄉官稅急江路客帆無

時江上有

警舟楫不通者累月

屬纊應多恨遺言倘不誣何當臨一哭揮涕問

諸孤

身後無窮事知君念不忘畢婚纔一女未葬已三喪戎馬

生涯盡妻孥歸計長脊令有高義珍重檢詩囊

從叔如孫問道赴喪

宿州旅店逢葉子羽明府赴京謁選

偶憩荒城暮何期舊雨來相看俱有適問我覺疑猜旅店

因茶坐家書借紙裁薊門逢二妙為說苦炎埃

時有書寓方蛟峰兄

亦以家書寄還

十年徼一命三度走長安行路寧辭苦補官猶且難子身

依估店半夜上征鞍他日分符出應知范叔寒

午日張楚材萬瞿客招集樊桐堂有賦

異鄉佳節慣古渡野航輕轉覺笙歌鬧難為遊子情菖蒲

隨酒泛角黍入盤盈此意堪傾倒何須弔屈平

高會憐時節清言破冥蒙漫云風土異儘與故鄉同艾葉

滿頭綠榴花撇眼紅那堪懷舊意對酒惜飄蓬

庚子初度

莫道廬居日空過強仕年縣弧應不利彈鋏亦無緣雨打

迴廊溼風吹軟葛穿從來初度熱稀得似秋天

年年逢此日尊酒獻慈親講習容兒輟歸寧迫女頻何曾
成獨酌兼亦乏姻賓念我應惆悵蕭蕭風雨晨

胡濤公以篆刻見贈賦謝

廿載江淮客歸來雪滿簪分明還故里依舊宿禪林借馬
不懷刺依人每碎琴燈前鐫小篆珍重比南金

劉前度爲予畫扇贈之

亦有山林癖煙霞勞見分始知能大隱不必定離羣古木
秋江渺孤亭夜雨聞何當覓東絹染盡武夷雲

劉閩人

許綏人齊古愚張如三方井公張敦復從祖彥升各
有書至懷之

故人書竝到怪我久淹留忽聽林間雨難禁此夜秋孤鴻
天外至雙屐夢中遊祇恐歸來晚連檣下石頭

出門

倦翮纔還里吟鞭又渡河歸裝猶未解前路是重過且喜
炎天盡兼逢遊侶多此行匪干謁應許慰蹉跎
飢驅非得已此別意何凄嘗藥難將母懷妊有病妻驪駒
嘶日暮孤鴈入雲低穉子知行色牽衣傍我啼

舒城阻雨

愁霖渾不厭三日到舒城野濶雲無定田荒路失平滿山
皆雨意落葉盡秋聲稍喜逢良友朝朝竝轡行

時遇方舒來同行

謁閔子祠墓

閔子一儒者高風永不泯孝能慈後母義足却權臣墓古
存蒼碣祠荒有白蘋戚塋曾幾代松柏盡為薪墓傍有國戚塋

方爾止自白門來得顧處士與治凶問哭之

處士聲名久詩篇與字傳竟無孫子讀尚賴友生賢老作

陪京叟竟消數頃田少微星隕後蕭颯大江邊

爾止云處士殯斂皆

施尚白任之且為梓詩集行世

與方退谷象山長參對雪作

滿壁生虛白圍爐却啓扉官齋原自冷不厭雪霏霏落處
茶煙細飄來酒力微翻疑剡溪上倚櫂看花飛

送阮子靜司理之任襄陽

釋褐初司法名邦獨爾宜好沿江漢上莫為雪霜遲酒憶
高陽飲山看峴首碑到時饒勝賞先拜武侯祠

送方退谷之曲阜謁孔林兼訪趙五絃司理

記室雖無及宮牆敢後趨且須遊闕里勿復歎窮途古木

楷兼檜清流泗與洙主人本故舊吟賞未應孤

退谷時赴趙司理之

幕以趙遷南安丞不果

喜陳簡菴至濟同宿署中即送其遊東兗

荒署正愁寂巡簷仰古槐分無良友至何意有君來數載
音書隔他鄉懷抱開且看今夜月寒析莫相催

連牀終夜話灑淚復欷歔多病貧猶劇憂讒計轉疎潁川
方寄食魯郡又驅車此去逢知己憑風一慰予

家書至喜生第三子

昨夜燈含蕊今朝鵲噪簷家書千里至欲發轉猜嫌但祝
婦無恙那知丁更添長成吾願足此外復何占

獨鶴

獨鶴嗟何瘦階除緩緩行亦知樊籠賤難割稻梁情仙路
應無分官齋聊一鳴夜來霜露警空惜羽毛輕

懷王瞻文不至

屈指公車近胡爲滯故鄉北來風漸烈至後日猶長濟上
河魚賤官齋魯酒香十年寒枕被遲爾一連牀

送吳雨蒼之任涪州

聞道涪陵郡荒殘不可尋荔枝荆棘底猛虎市城陰買權

沿江路攜姬慰客心盤根須利器莫畏五溪深

涪州舊有
妃子荔枝

園雨蒼云今城中
多虎人煙亦少矣

方蛟峰以繭綢人襪遠貽老母賦謝

客夢輕千里登堂最愴神病誰添藥餌寒祇舊縫紉遼海
人襪潤沂州山繭真感君猶子義歲晚慰慈親

夢幼女憶之

幼女姝聰慧啼聲久不聞母懷纔一歲弟乳已平分入夢

知多病還家應最欣何當綠絲布看剪作花裙

張揆原水部餉酒贈金兼以馳章制義見示賦謝

宦海存高義如君復幾人乍逢情款款別去語諄諄初晤揆原

濟署中即期以過訪臨別猶叮嚀至再送酒亦何厚分金較更真署齋寒欲

絕旅况一回春

復惠文成帙兼貽誥一通螢編分柳綠龍篆照花紅品隲

推金友佳刻為令兄馳封報阿翁何時却迎養立雪鯉庭

中尊甫先生舊鐸吾桐

曲阜道中

一入先師里斯文便不同山川多秀色閭巷有儒風歸老

周流後藏書魯壁中何須謁林廟瞻企已無窮

孔林咏楷次施尚白學憲韻楷即子貢廬墓時手植者

築室人何在文楷傳至今六年無限淚千載覺同心寶殿

長留影殘碑尚有陰拜瞻經此地安得不霑襟

清明送方子謨子銘還里時省其兄于濟署將由白門還桐

客中頻送客又送二難歸况值清明日思家淚幾揮桃花

風漸息柳絮鱗將肥羨爾乘春水揚舫入舊畿

獻歲欲歸去茲辰始送行見君濡滯色使我益怍怍分橐

憐兄苦扁舟附友輕何時到桐子為慰倚閭情

寄懷吳蠡遊客郵城

分袂無多日家書忽愴予斷腸嗟已矣

時有亡女之痛

搯臂痛何

如聞老母病

上舍寧彈鋏王門且曳裾鄉心今益切遲爾竝驅

車

賦得何時爲客苦

予以去夏客彭門至秋始返甫匝月卽來濟陰今夏猶未歸合計一年時序客中幾備歷之因爲此詩以

誌旅况云爾

何時爲客苦最苦是元正生菜他鄉俗椒花兒女情離家已昨歲歸夢又春明焉得庭闈畔屠蘇細細傾

何時爲客苦最苦是元宵月鬼憐初滿燈花怯後凋傷人看火樹獨自渡星橋一任笙歌沸離愁轉寂寥

何時爲客苦最苦是清明寒食忽云過春衣猶未成炊煙隨俗換上塚看人行安忍携壺榼他鄉聽鳥鳴

何時爲客苦最苦是端陽仙艾從人插香蒲祇獨嘗辟兵因世亂續命惜年光遙憶諸兒女繒絲縷縷長

何時爲客苦最苦是中秋夜靜人俱散天高月滿樓孤雲煙際沒虛幌夢中遊不待蛩吟罷清霜萬里浮

何時爲客苦最苦是重陽送酒仍佳節登高非故鄉詩應擬摩詰賦不羨滕王惟憶東籬下西風菊正黃

何時爲客苦最苦是年除淚逐燈花落愁生爆竹餘鄉心

千里急生計一時疎僻巷知誰到梅花亞草廬
何時爲客苦最苦是殘春蠟屐行應徧流觴跡已陳鵲啼
孤枕月花落故園塵又送春歸去人歸真未真
何時爲客苦最苦是炎天卧簟應無酒烹茶不擇泉人前
須束帶上馬更揚鞭安得搖紈扇攤書翠竹邊
何時爲客苦最苦是新秋纔覺西風起已添無限愁單衣
驚落葉孤影如牽牛縱有鱸魚思還家不可求
何時爲客苦最苦是嚴冬雪戀寒厨重霜欺敝褐濃詩成
無酒補家遠有雲封始羨袁安臥關門日幾春
何時爲客苦最苦是生辰游子青年減高堂白髮新關河
銷歲月筋力老風塵底事懸弧矢江湖作散人

廬州道中

廬陽來去路一過一徘徊去爲征程急來因歸思催此鄉

惟表妹

龔氏妹吾
姑女也

別日尚嬰孩廿載無由見那堪首重回

憶崱崭山刹兼懷曹印上人

崱崭層峰上吾曾坐翠微

甲午夏曾
讀書其地

燒燈窺日出俯檻看

雲飛地迴蛟蠅絕厨香莧筍肥最憐月黑夜衝虎一僧歸

曹公每以月夜還
山遇虎輒叱去之

早夏曉行

出戶雞纔唱瀾天霧尚漫青燈迷夜氣白衿戀春寒獨樹

木犀集十三
當人立繁星勒馬看家家門未啓深閉露華溥

過官莊橋有懷王爾須先生

先生諱夷吾以詩名罵賊不屈而死

郊行纜數里流水漸聞聲店以莊成市橋因官得名牛羊

循隴熟桑柘抱材明舊日談經處春來草又生

先生家于橋頭予兄弟曾受業門下

業門下

壬寅冬為先君營葬事畢示兒子仁樹

橫山一片地賴有外家存

先恭人外家所售

但可安魂魄那須計

子孫卜隣猶祖澤

距木山先壠五里許

賣產亦親恩

時鬻田數畝營窀穸

何日

焚黃訖穹碑表墓門

水仙花

閉戶寒侵骨虛窻暗逗春折梅剛少伴賴爾作比隣臨水

真仙子低顏似美人不逢幽賞客冷艷與誰親

寄懷章素文

寂寥楊顧後

子常磨士

君獨障狂瀾山水清音迴園亭冰鏡寒

素文自顏其選曰清音所居有滄浪亭

名高猶鍵戶才大早登壇寄我琅玕

好開槭仔細看

寓白門承恩寺偶遇富平趙述古邂逅定交兼損雅

賦贈

偶爾萍逢日聞聲喜欲狂市喧韋布賤寺古姓名藏嘉賦

風生腋

時方盛暑惠以買葛之資

奇文字有霜

所賜佳稿甚夥

非君湖海士誰

解橐中裝

趙爲江寧守重客

丹陽道中

黃鸝向客啼垂柳望中迷津樹迎江合漁罾選埠齊雨來
官渡駛雲去女墻低聽說前朝墓悲風萬馬嘶
丹陽何處是烟樹暮雲中海燕低翻雨江豚遠拜風燈明
沽酒店笠罨釣魚翁待曉揚舫好河流曲折通

初至毘陵訪方象山道院卽宿其窩齋

停橈繞繫纜未敢問官衙入市人烟密祈年廟祀譁非君
先作客安得我如家且借今宵酒深談到月斜

岳邁亭招飲家園有贈

入戶猶常境尋幽轉不窮亭寒雲影外人靜鳥聲中樞火
全遮日荷珠暗受風感君投轄意自摘碧香筩

贈李研齋先生

先朝文物盡今日見遺民冰雪雙蓬鬢乾坤一葛巾天心
難厭亂蜀道已通秦百口聞猶在誰憐乞米人
天問樓中客問天天豈噀雪埋陽羨權花夢錦官春世法
窮逾拙文章老更神讀君新著述肯作劇秦人

螢

何來螢火焰冉冉下庭隅帶雨有時見隨風忽已徂絺衣
霑欲濕紈扇撲還無夜靜紗窗外微明一點孤

楊靜山先生招同李研齋方象山諸子集

干人非我輩到此悔依劉魚鉢無知已瓜棚訪故侯藤花
沿路密灌木上堦稠不改園名舊還將姓氏畱

避暑來河朔招尋有碧筩玉堂縈舊夢金谷發新叢修竹

挈雲起危橋引澗通虛名知誤我感極愧飄蓬先生謬賞
予制義決

為必
售

贈鄒訒士董文友

蘭陵搴赤幟鄒董實先鞭詩寡陽春和詞追子夜妍論文

傾蓋合得句貫珠聯何日雞林賈容予姓字傳時方有詩
餘之選

楊靜山先生以楊梅見貺賦謝

美貺傾籠至堆盤顆顆霞火珠紅似錦紫玉艷如花自是

楊家果何來潘令車他時佳話出益藉有光華白詩潘楊
亦覺有光

訪張繡虎不遇

松門空佇立何處曳長裾患海飄零久名場潦倒餘鬚眉

猶鐵戟杖履任籃輿故國田園在歸山好著書

鄒訒士招同李研齋郭凌海蔣玉大陳其年方象山

董文友過集

高會天涯少衝泥着屐過雨飄羅幔淨涼入綺筵多歌板

愁中劇觥章醉後苛林端纔月上莫問夜如何

楊陶雲庶常過訪有贈

到來軒從盛荒徑未教鋤曾校立亭草還窺東觀書麻衣
新聖室鹵簿舊丹除前席恩非遠需君領石渠

陳賡明招飲高會君子堂賦贈

十年勞寤寐今始識荊州名下真驚坐詩成似倚樓多才
輕一第高會重千秋翻藉兵厨酒燈前弄蒯緱

方爾止自虞山歸舟過毘陵過訪寓齋酣談竟夕

曾躋青溪櫂匆匆未一聞萍踪偶相遇鴻爪恰同群涼月
窺簷隙深杯戀夜分却嫌河朔飲絲管太紛紛時予赴畢
淄潛司李

之招聞爾止至
未終席而返

爾止為言虞山先生垂注不置感賦

當代推詞宿虞山碩果遺文瀾初學集史筆列朝詩先生
列朝
詩選人立小
傳有史裁老我同顏駟勞君說項斯爾止為誦予詩十
數篇先生首肯者

再代興吾豈敢或可奉槃匱

毘陵曉發

早起趁涼行篷窗不辨明殘更疑未盡落月似初生隔岸
人纔語前村櫂有聲烟汀一回首已失闔閭城時風利已
過錫山

陳伯璣貽我愛琴館集賦贈

高士南州最詞場早築壇伯璣有詩慰
國雅諸選雅存當代慎詩慰

故人寬廿載傷時劇扁舟念友寒謂劉遠
公也清琴知自愛古

調莫輕彈

楊爾京以所選詩義正始見惠賦謝

一編傳世業家學本宗工代溯成弘遠文追正始隆西江

方化雨

尊公青巖先生方視學江右倡明經學

薄海更同風溲勃誠何濟勞

收藥籠中

集中謬登拙作數義

次韻酬林茂之先輩見贈

詞玷知名久新詩今更多逢人矜許可好我意如何古道

悲長缺深情託短歌不須頻枉駕暇日定重過

方爾止招同林茂之陳伯璣董文友陳其年過集

三年來一度來必上君堂懷漑人何在哺雛意未忘

爾止自顏

其堂曰懷漑軒曰哺雛

風迴竹葉亂雨過衿衣涼滿壁梅花影深盃

坐夕陽

爾止見訪寓齋偶及沈氏一門三烈事感而有作

事敗赴黃泉頭顱肯獨全誰言三女嫠祇有一夫天携手

朝丹闕封章拜綠箋夜臺容聚首不異畫樓前

訪倪闇公快談有贈

六朝風雅散思爾一相過律細追長慶書工敵永和牙籤

填架滿鶴蓋到門多却恐空歸去披帷喜若何

林祖直畫扇見貽賦謝

老筆槎牙處經營似獨殊聞君生白下亦返武夷無遠邇

層烟沒空林緩步紆何當劈生紙爲寫乳山圖

先生自署

乳山道士

贈汪舟次

黃海饒奇秀全從筆底收文章驚寓內花月占邗溝家計

交遊損才名姓字畱風濤君莫畏好作濟川舟

舟次新安人僑寓廣

陵以佳集見貽

闡試竣題號舍壁上

橐筆不能寐俄驚燭影殘青衫秋漸薄白露夜初寒難了

燈窻願重回鎖院看三年須一到爲勸老親餐

張覲文星若彤友唐實君艤舟秦淮見過言別

言歸何太遽豈是憶尊鱸異姓弟兄樂名園師友俱布帆

同一葉鉛槧擅三吳祇恐秋江上明朝捷騎呼

金陵雜感

六年不到處戰壘識重圍木柵烏衣巷樓船燕子磯寒潮

隨雨進江路待人歸木末亭猶在秋風捲落暉

王氣猶京口降帆已石頭可憐一載夢難抵六朝羞雨報

黃花節風生白紵秋老僧談往事叉手罵黔州

秋去歸無計江干訪隱淪如何寒橘到不見寢園陳靈谷

梅全秃鍾山木盡薪白頭遺老在猶說守陵人

桃葉復桃葉千年盪槳游人如鳧雁集船似鷺鷥浮誰把

虹橋換空看碧水流舉場年少客翻訝渡無舟

天界前朝寺花香上戒衣十年前作客此地澹忘歸秋至

笋應茁甲午秋僑寓振衣菴食缸笋甚美重來松更稀牛車門外立不敢

叩禪扉

京兆宮牆地門前淮水流垂楊縈碧檻畫舫對紅樓待月

歌喉緩凭橋入耳幽路人今亦少馬草塞街頭

遂步迤西去曾來挽鈿車譚童俱宿草流寓時兩故人王董亦空

花青溪二妓客訪新香刹人談舊狹斜年年橋畔柳春到尚藏

鴉

蹀躞長千里輕肥自五陵逃名前輩讓芑山先生盛以選事相推覓舉

少年憎文似過時鳩人真退院僧時寓報恩寺之老退居黃昏無酒

伴看點塔前燈

夜半江濤漲如聞戰鼓哀霜風猶未到落葉忽成堆空積

千秋恨難登九日臺憑誰報籬菊畱待客歸來

蕪陰舟中喜得張夢敦捷音卽送其南下

獻賦同歸里揚舲羨此行一帆秋水下百里暮潮平遇主

名方重登仙舟倍輕臨岐吾悵別君自急南征

歸舟泊李陽河呈綏人古愚如三

來徃蘆花路低頭笑復嗔片帆懸雨色雙槳盪秋旻村店

到猶記鄉音聽漸親江干新酒熟不醉倦遊人

宿錢飲光田間草堂

舊遊天末久新築草堂寬
俠骨貧逾健詩肩老更寒
病僧施佛火古桂礙儒冠
穉子知延客懽呼夜未闌

除夕

家廟辭年後兒童倦不譁
神荼明蚤帖商陸夜深加
欲祭詩惟酒頻挑燈有花
囑窮休錯去還到舊遊家

聞張夢敦春闈落第詩以寄慰

不第亦常事無爲歎數奇
上書知有日捧檄悵何時
年少名尤著才高遇豈遲
試思江畔櫂含淚送君時

謂去秋蕪湖送別也

木厓集卷之十三終

